

## Pasonir Khan Laga Kaam

### *Pobitro Atma Laga Protigya*

<sup>1</sup> O Theophilus, moi laga prothom kitab te\*, Jisu pora ki hikai se aru ki korise, <sup>2</sup> Taike sorgote loi najuwa din tak, aru Pobitro Atma laga hokti pora Jisu nijor basi luwa apostle khan ke hukum diya khan laga likhi dise. <sup>3</sup> Tai bisi dukh kori kene morise aru wapas jee uthija-a pichete, Tai chalis din tak hosa pora jinda hoise koi kene dikhai dise, aru Isor rajyo laga kotha taikhan ke koi dise. <sup>4</sup> Tai jitia taikhan logote thakise, tai hukum dise Jerusalem chari kene najabole, aru Baba laga itcha rukhi thaki bole juntu laga kotha Tai koise, “Tumikhan etu kotha moi pora huni loise <sup>5</sup> John to pani pora Baptizma dise, kintu tumikhan to olop din pichete Pobitro Atma pora baptizma pabo.”

### *Uthi Juwa*

<sup>6</sup> Jitia Jisu aru chela khan eke logot joma korise, titia taikhan eneka hudise, “Probhu Apuni etu homoi te Israel laga rajyo wapas dibo naki?” <sup>7</sup> Kintu Tai taikhan ke koise, “Etu tumikhan janibole din aru homoi aha nai, Baba he nijor adhikar aru hokti pora koribo. <sup>8</sup> Kintu tumikhan hokti pabo, jitia Pobitro Atma ahibo, aru tumikhan Moi laga gawahi dibo, Jerusalem te, aru Judea aru Samaria te aru prithibi laga sob

---

\* **1:1** 1.1 Luke laga susamachar.

jagate.” <sup>9</sup> Jitia Probhu Jisu taikhan ke etu kotha khan koi dise, aru taikhan upor phale sai thakise, titia Taike uporte uthai loi jaise, aru badal ahi kene taike bondh kori dise aru taikhan laga suku pora eku nadikha hoi jaise. <sup>10</sup> Jitia taikhan Jisu ke sorgote loijai thaka to sai thakise, achanak pora, duijon manu boga kapra lagai kene taikhan usorte khara hoi jaise. <sup>11</sup> Aru tai duijon pora koise, “Galilee laga manu khan, tumikhan kele sorgo phale saikene khara kori ase? Jisu junke sorgote loi jaise, Taike sorgote loi juwa dikha nisen a aru Tai wapas eneka aha dikhibo.”

### *Judas Bodli Matthias Ke Basi Luwa*

<sup>12</sup> Titia chela khan Jerusalem sheher te ahise, Oliv Pahar pora, jun to Jerusalem pora ekta Bisram din nisen a dur te ase†. <sup>13</sup> Taikhan ponchi kene upor kamra te jaise, aru ta te Peter, James, John, aru Andrew, Philip aru Thomas, Bartholomew, Matthew, Alpheus laga chokra James, Simon Zealot aru James laga chokra Judas khan bohi thakise. <sup>14</sup> Taikhan sob eke mon hoi kene prathana korise, ta te mahila khan bhi thakise, aru Jisu laga ama Mary aru Tai bhai khan bhi thakise.

<sup>15</sup> Aru etu homoi te eksoh bis nisen a bhai khan joma thakise, titia Peter koise, <sup>16</sup> “Bhai khan, Shastro te ki likha ase etu pura hobo lagibo, Pobitro Atma dwara David laga mukh pora Judas nimate koi disele, jun he Jisu ke dhoribole manu khan ke loi anise. <sup>17</sup> Keleman e Judas bhi amikhan logote ginti korise, aru Isor laga kaam kori bole tai laga bhag bhi thakise.”

† **1:12** 1.12 Ek ghanta laga safar.

18 - Ekjon manu tai laga letera kamai pora kheti kinise, aru etu jagate tai poila matha ulta kori kene girise, aru tai laga pet phati jaise, aru pet nari sob bahar te ulai jaise. <sup>19</sup> Aru Jerusalem sheher te thaka manu sob etu kotha janise, aru titia taikhan nijor kotha‡ pora etu kheti laga naam "Akeldama," rakhidise juntu laga motlob ase, "Khun laga Kheti."- <sup>20</sup> "Kelemanee Bhajan Geet laga Kitab te likha ase, 'Tai laga kheti khali hoi jabo, Ta te kunke bhi thaki bole nadibi,' Aru 'kunba pora tai laga kaam to loi lobole dibi§.' <sup>21</sup> Etu dorkar ase, kelemanee, Probhu Jisu thaka homoi pora Tai naja tak kunkhan amikhan logote thakise, <sup>22</sup> shuru pora John ke baptizma diya homoi aru Jisu ke amikhan logot pora uthai loi naja tak- etu majot pora, ekjon manu amikhan logote mili kene Tai arubi jee uthija-a laga gawahi kori bole lage." <sup>23</sup> Aru taikhan duijon manu ke age te rakhise, Joseph junke Barsabbas aru Justus bhi mate, aru Matthias. <sup>24</sup> Aru taikhan prathana kori kene koise, "Apuni, Probhu, sob manu laga mon jane, etu nimite duijon majote kunke basi loise etu jonai dibi <sup>25</sup> kun he sewa laga jaga lobo juntu Judas pora chari kene nijor jagate jai jaise." <sup>26</sup> Titia taikhan chithi korise, aru chithi te Matthias laga naam ulaise, aru egaroh jon chela majote tai bhi ginti hoi jaise.

## 2

---

‡ 1:19 1.19 Aramaic bhasa. § 1:20 1.20 Ps 69:25; Ps 109:8.

### *Pobitro Atma Aha*

<sup>1</sup> Jitia Pentecost din ahise, biswasi khan sob ek jagah te joma hoise. <sup>2</sup> Aru achanak ta te awaj ekta sorgo pora ahise, aru taikhan bohi thaka pura ghor to bhorta hoi jaise. <sup>3</sup> Titia taikhan age te juli thaka jui nisena ulaise, aru ekjon-ekjon uporte bohi jaise. <sup>4</sup> Aru taikhan sob Pobitro Atma pora bhorta hoise aru alag kotha pora kobole shuru hoise, Atma pora taikhan ke dusra bhasa pora kobole sikhai dise.

<sup>5</sup> Aru Jerusalem te Isor jana Yehudi manu khan thakise, aru akas nichete thaka sob desh pora ahikena ta te thakise. <sup>6</sup> Aru jitia etu awaj ulaise, ta te manu khan sob ahi kene asurit lagise kelemane taikhan nijor laga kotha pora koi thaka hunise. <sup>7</sup> Titia taikhan sob asurit hoi jaise; aru taikhan koise, “Sabi, etu kotha koi thaka khan Galilee manu khan nohoi naki? <sup>8</sup> Tenehoile kineka taikhan laga mukh pora amikhan ki kotha koi kene jonom korise etu kotha koi ase? <sup>9</sup> Parthia laga aru Mede aru Elam laga, aru kun Mesopotamia te thake, Judea aru Cappadocia, Pontus aru Asia te, <sup>10</sup> Phrygia aru Pamphylia, Egypt aru Cyrene usorte Libya, aru Rome phale jai thaka manu khan, <sup>11</sup> aru Yehudi aru proselyte khan, Crete manu khan aru Arab manu khan, taikhan Isor laga dangor aru asurit kaam kora to amikhan laga bhasa pora koi thaka to hunise.” <sup>12</sup> Taikhan sob asurit pora bhabona kori kene, aru ekjon-ekjon ke koise, “Etu laga ki motlob ase?” <sup>13</sup> Kintu dusra biswasi khan pora sorom khilai kene koise, “Taikhan nisa pani kori kene ase.”

*Pentecost Dinte Peter Laga Susamachar*

14 Kintu Peter egaroh jon logote khara hoi kene jor pora taikhan ke koise, "Judea laga manu khan aru Jerusalem te thaka khan, apnikhan etu jani lobi, aru moi ki koi ase etu bhal kori kene huni lobi. 15 Kintu etu manu khan to apuni khan pora bhabona kora nisena nisa pani khai kene thaka nohoi, kelemane etiya phojur nou-baji he ase.

16 Kintu etu kotha bhabobadi Joel pora koise:

17 'Eneka hekh dinte hobo, Isor pora koise,  
Moi laga Atma sob manu uporte di dibo  
Tumikhan laga chokra chukri khan pora  
bhabobani koribo,

Aru jawan manu khan darshan pabo,

Aru bura manu khan sapna dikhibo.

18 Aru Moi laga noukar aru mahila noukar khan uporte

Moi laga Atma di dibo, aru taikhan bhabobani kobo.

19 Moi akas

Aru prithibi te asurit kaam dikhai dibo,

Khun aru jui aru dhuwa laga bhap.

20 Titia suryo to andhera hoi jabo

Aru chand to khun nisena dikhibo,

Probhu laga dangor mohima din naha age te eitu khan sob hobo.

21 Aru jun manu hekh homoi tak Probhu laga naam loi kene thake tai bachi jabo\*.'

22 Israel laga manu khan, etu kotha huni bhi, Nazareth Jisu eneka manu thakise junke Isor pora tumikhan nimite pathai dise dangor aru asurit kaam kori bole nimite, aru etu sob Isor

---

\* **2:21** 2.21 Joe. 2.28-32.

pora Probhu Jisu ke loi kene korise, aru etu sob tumikhan pora dikhise. <sup>23</sup> Tai Jisu to, Isor pora kineka age pora bhabona korise aru tai laga gyaan pora, Jisu ke biya manu hathte di dise, aru tumikhan Taike gojal mari kene ekta Cross te morai dise. <sup>24</sup> Tai ekjon ase junke Isor mora pora jinda kori dise, mora pora taike chari dise, kelemane Taike mora pora aru bandhi rakhibole para nai. <sup>25</sup> Kelemane David Tai nimite koise,

'Moi Probhu ke hodai moi laga chehera usorte dikhe,

Tai moi laga dyna hathte thake, moi biya rasta te najabo nimite.

<sup>26</sup> Etu karone, moi laga mon khushi ase aru moi laga jiba pora dhanyavad kore.

Aru, moi laga gaw bhi biswas te jinda thakibo.

<sup>27</sup> Kelemane Apuni moi laga jibon Hades† te chari nadibo,

Aru Apuni laga Pobitro Jonke puchibo nadibo.

<sup>28</sup> Apuni moike jibon laga rasta dikhai dise;

Aru apuni laga usorte moike khushi pora bhorta kori dibo‡.'

<sup>29</sup> Bhai khan, moi apuni khan ke etu kobole pari ase ki amikhan laga purush-Baba David pora ki kaam korise, aru tai morise aru taike kobor dise, aru tai laga kobor aji tak amikhan logote ase.

<sup>30</sup> Etu karone, tai ekjon bhabobadi thakise aru jani thakise Isor tai logote kosom khaise, tai laga khandan pora ekjon ulabo aru uthaikene Tai laga singhason te bohai dibo§. <sup>31</sup> Aru aha dinte ki

---

† **2:27** 2.27 Mora laga desh. ‡ **2:28** 2.28 Psa. 16:8-11. § **2:30** 2.30 Psa. 132:11.

hobole ase etu sob to dikhi kene, tai Khrista mora pora jinda huwa laga kotha koise,  
 'Taike Hades te bhi chari diya nai, aru Tai laga gaw bhi puchi janai\*.'

<sup>32</sup> Jisu ke Isor he jinda kori dise, aru amikhan sob Jisu jee-utha laga gawahi ase. <sup>33</sup> Etu nimite Taike Isor laga dyna hathte bohahi kene uthai dise aru Baba Isor pora Tai laga Pobitro Atma amikhan uporte di dise, juntu apnikhan dikhi ase aru huni bole pari ase.

<sup>34</sup> Keleman David to sorgote uthai loi juwa nai, kintu tai nije koise,  
 'Probhu he moi laga Probhu ke koise, "Ami laga dyna hathte bohahi,

<sup>35</sup> Jitia tak tumi laga dushman khan ke tumi laga theng rakha jaga bonai nadiye†.' "

<sup>36</sup> Etu karone, Israel te jiman ghor ase etu jani lobi, Isor pora Taike Probhu aru Khrista bonai dise, etu Jisu, junke tumikhan Cross te morai dise."

<sup>37</sup> Jitia etu kotha hunise, taikhan monte jokhom paise, aru Peter aru ta te thaka apostle khan ke koise, "Bhai khan, amikhan ki koribo?" <sup>38</sup> Titia Peter taikhan ke jowab dise, "Mon ghura bhi, moi koi ase, aru baptizma koribi, sob manu, Jisu Khrista naam pora, nijor laga paap nimite, titia tumikhan Pobitro Atma laga inam pabo.

<sup>39</sup> Keleman etu Isor laga kosom apuni aru apuni khan laga bacha khan nimite ase, aru Probhu Isor pora junke matibo, taikhan nimite bhi ase‡."

<sup>40</sup> Tai aru bisi kotha pora gawahi dikena taikhan

---

\* **2:31** 2.31 Psa. 16:10. † **2:35** 2.35 Psa. 110:1. ‡ **2:39** 2.39 Joe. 2:32.

ke samjai se, aru koise, “Nijorke biya manu khan pora bachai rakhibi.” <sup>41</sup> Titia taikhan sob huni kene baptizma loise, aru tin hajar jon thaka biswasi khan logote aru bhi ginti kori loise.

### *Biswasi Khan Majote Sob Saman Eke Bhag Kora*

<sup>42</sup> Aru taikhan apostle khan pora ki sikhai dise etu kotha khan koi jai thakise aru ekjon-ekjon logote girja kori thakise, aru roti bhangai kene prathana te thakise.

<sup>43</sup> Aru sob logote bhoi ahi jaise, aru apostle khan dwara asurit kaam korise. <sup>44</sup> Aru biswasi khan logote mili kene thakise, aru sob kaam mili kene kori thakise. <sup>45</sup> Aru taikhan nijor dhun-sampoti aru saman sob bikiri kori kene kunge lage taikhan ke bhag kori dise. <sup>46</sup> Aru hodai din ekta bhabona loi kene mondoli te kaam kore, aru ekjon-ekjon logote khushi aru mon sapha pora ghor te roti bhangai kene, <sup>47</sup> aru hodai Isor ke dhanyavad kori kene, aru sob logot pora morom paikene thakise. Aru hodai jiman Probhu logot biswas kori loi, taikhan majote ginti hoi thakise.

## 3

### *Lengra Bhikari Bhal Huwa*

<sup>1</sup> Ek din, tin baji homoi te, Peter aru John prathana kori bole mondoli te jai thakise. <sup>2</sup> Titia ta te ekjon manu ama laga pet pora bera bole napara thakise, aru manu khan pora hodai taike bukhi kene mondoli laga dorja Sundur koi kene mata jagate rakhi diye, taike mondoli te aha manu khan pora poisa mangibo nimate. <sup>3</sup> Tai

kitia Peter aru John ke mondoli bhitor te jai thaka dikhise, taikhan ke poisa mangise. <sup>4</sup> Kintu Peter aru John taikhe bhal kori saise aru koise, “Amikhan phale sabi.” <sup>5</sup> Titia etu bera bole napara manu taikhan ke saise, aru bhabise kiba taikhan pora pabo. <sup>6</sup> Kintu Peter koise, “Suna aru chandi moi logot nai, kintu ki moi logot ase, etu moi tumike dibo. Nazareth laga Jisu Khrista naam pora koi ase, uthi kene berabi.” <sup>7</sup> Aru Peter tai laga dyna hath dhori kene khara kori bole dise, aru etu homoi te theng laga hardi khan te takot ahi jaise. <sup>8</sup> Titia etu manu khara hoi kene bera bole shuru hoise; aru taikhan logote mondoli bhitor te jaise, kudi kene aru berai kene Isor ke dhanyavad dise. <sup>9</sup> Aru sob manu taikhe berai kene Isor ke dhanyavad kora dikhise. <sup>10</sup> Aru manu khan taikhe dikhi kene jani loise tai kun ase, tai jun mondoli laga Sundur dorjate bhik mangi thake; aru tai logot ki hoise etu dikhi kene taikhan bisi asurit hoi jaise.

### *Peter Pora Kotha Kowa*

<sup>11</sup> Aru tai Peter aru John logote jai thaka karone, sob manu polai ahi kene Solomon laga veranda kowa jagate joma hoise aru taikhan bisi asurit pora sai thakise. <sup>12</sup> Jitia Peter etu dikhise, tai manu khan ke koise, “Israel laga manu khan, etu dikhi kene kele iman asurit lagi ase? Aru kele amikhan ke eneka sai ase, amikhan laga hokti pora nohoile amikhan bisi bhal manu huwa pora taikhe berabo paribole diya nisena? <sup>13</sup> Abraham laga Isor, Isaac aru Jacob laga Isor, amikhan baba khan laga Isor, Tai laga noukar Jisu ke mohima

kori dise, tumikhan taike swekar kora nai aru Pilate laga hathte di dise, jitia Pilate pora Jisu ke chari dibo koise etu bhi tumikhan mana nai. <sup>14</sup> Tumikhan Pobitro aru dhormik ekjon ke luwa nai, aru manu morai diya ekjon ke chari dibole binti korise. <sup>15</sup> Kintu Jibon diya ke morai dise, junke Isor he mora pora aru jinda kori dise-aru amikhan utu laga sakhi ase. <sup>16</sup> Etiya, Jisu laga naam te aru biswas pora apnikhan junke dikhi ase taike takot kori dise. Jisu laga naam te aru Tai dwara thaka biswas pora etu manu ke apuni khan sob usorte pura bhal kori dise. <sup>17</sup> Etiya, bhai khan, moi jane apuni khan najani kene kori dise, aru tumikhan laga cholawta khan bhi eneka korise. <sup>18</sup> Kintu ji kotha Isor he tai laga bhabobadi khan mukh pora koi dise, Tai laga Khrista dukh pabo, aru Tai etu purah kori dise. <sup>19</sup> Mon ghura bhi, aru, titia nijor paap pora maph pabo, <sup>20</sup> Probhu laga asirbad apuni khan logote notun kori kene ahibo; aru Tai apuni khan nimite basi kene rakhi diya ekjon, Jisu Khrista ke pathai dibo. <sup>21</sup> Taike sorgote loi najabo jitia tak sob kaam pura nohoi, aru ji kotha Isor pora Tai laga pobitro bhabobadi khan laga mukh pora koi disele etu pura nohua tak. <sup>22</sup> Moses pora amikhan baba laga baba khan ke koise, 'Probhu Isor pora tumikhan nimite bhai khan majot pora moi nisena ekjon bhabobadi ulai dibo, aru tai ki kotha kobo etu tumikhan sob hunibo. <sup>23</sup> Aru kun etu bhabobadi laga kotha nahunibo, etu bhabobadi pora taike manu laga majot pora khotom kori dibo.' <sup>24</sup> Aru Samuel pora loi kene jiman bhabobadi khan tai pichete ahise, taikhan

sob pora etu din laga kotha he koise. <sup>25</sup> Apuni khan bhabobadi khan laga bacha khan ase, aru Isor pora apnikhan laga baba khan logote kowa nisena, Abraham ke koise, 'Aru tumi laga bijon pora duniya te sob parivar asishit hobo\*.' <sup>26</sup> Jitia Isor pora Tai laga noukar ke mora pora jinda kori dise, Tai pora Taikhe tumikhan usorte poila pathai dise, tumikhan laga biya kaam pora ghurai kene loi anibo aru asirbad dibo nimate."

## 4

### *Peter Aru John Sabha Age Te*

<sup>1</sup> Jitia Peter aru John duijon pora manu khan logote kotha kori thakise, purohit khan aru mon-doli laga henedhikari khan aru kunba sadducee khan taikhan duijon logot te ahise. <sup>2</sup> Taikhan bisi chinta hoi jaise, kelemane Peter aru John duijon to Jisu mora pora jinda uthijaise koi kene manu khan ke sikhai thakise. <sup>3</sup> Aru taikhan duijon ke dhori kene dusra din phojur tak bondhi ghor te rakhidise, kelemane saam hoija karone. <sup>4</sup> Kintu jiman manu etu kotha hunise taikhan Jisu ke biswas korise; aru biswas kora manu khan sob milai kene panch hajar nisena hoi jaise. <sup>5</sup> Aru dusra dinte cholawta aru bura manu khan aru niyom likha khan sob Jerusalem te joma hoise. <sup>6</sup> Aru Annas moha purohit bhi ta te thakise, aru Caiaphas, John aru Alexandra aru jiman dangor purohit sob joma hoise. <sup>7</sup> Aru jitia Peter aru John ke taikhan laga majote rakhise, taikhan ke hudise, "Kun laga takot aru kun laga naam pora

---

\* **3:25** 3.25 Gen. 12:3, 18:18, 22:18, 26:4.

tumikhan etu korise?” <sup>8</sup> Titia Peter, Pobitro Atma pora bharta hoi kene, taikhan ke koise, “Apuni cholawta khan, aru bura manu khan, <sup>9</sup> amikhan ke ekta bemaar manu ke bhal kaam kori diya nimite hudi ase koile, kineka kori kene tai bhal hoise? <sup>10</sup> Apuni khan aru Israel laga manu sob pora jani lobi, Nazareth Jisu Khrista naam pora, kunte tumikhan Cross te morai dise, kintu mora pora Taike Isor jinda kori dise, Tai laga naam pora etu manu bhal hoi kene tumikhan usorte khara ase. <sup>11</sup> Jisu Khrista etu pathor ase junke apuni khan pora phelai dise, ghor bona manu khan, kintu etu pathor he sob pora bhal aru kaam laga pathor hoi jaise\*. <sup>12</sup> Aru Tai nohoile dusra kun bhi poritran dibole na paribo, kelemane sorgo laga nichete kun bhi eneka nai amikhan laga paap pora mukti dibole nimite.”

<sup>13</sup> Jitia taikhan Peter aru John laga mon dangor dikhise, aru taikhan likha pora manu nohoi koi kene janise, taikhan asurit lagise, aru titia taikhan Jisu logote thakise koi kene chini bole parise. <sup>14</sup> Aru taikhan dikhise bhal hoi juwa manu tai duijon logote khara hoi thakise, aru taikhan eku bhi kobo para nai. <sup>15</sup> Aru jitia apostle khan ke sabha laga bahar te pathai dise, taikhan nijor majot te kotha patise. <sup>16</sup> Taikhan majot te eneka hudi thakise, “Amikhan etu duijon ke ki kori dile bhal hobo? Kelemane tai duijon pora asurit kaam kori diya to Jerusalem te thaka sob jani jaise, aru amikhan etu mana koribo na paribo. <sup>17</sup> Kintu etu kotha dusra jagate bisi

---

\* **4:11** 4.11 Psa. 118:22; Dan. 2:34-35.

najabo nimite, amikhan tai duijon ke koi dibo etu naam loi kene dusra ke aru nahikabole.”  
<sup>18</sup> Titia taikhan Peter aru John ke mati kene anise aru Jisu laga naam te nashika bole hukum dise. <sup>19</sup> Kintu Peter aru John taikhan ke koise, “Isor laga kotha huna to thik ase na apnikhan laga kotha mana to thik ase, etu apnikhan bhabi sabi. <sup>20</sup> Kelemanee amikhan ki dikhise aru hunise etu nokoi kene thaki bole na paribo.” <sup>21</sup> Titia Peter aru John ke dhomki dikene jabole dise, kelemanee manu khan tai duijon laga asurit kaam to dikhi kene Isor ke dhanyavad di thakise aru tai duijon ke sajai dibole eku golti taikhan dikha nai. <sup>22</sup> Kelemanee junke asurit pora changai kori dise etu manu chalis saal pora dangor thakise.

*Bhoi Nakoribo Karone Biswasi Khan Prathana Kora*

<sup>23</sup> Jitia tai duijon ke chari dise, Peter aru John nijor manu khan logote jai kene maha purohit khan aru cholawta khan pora ki koise etu taikhan ke koi dise. <sup>24</sup> Jitia taikhan etu hunise, taikhan sob awaj uthaikene eke logote Isor ke prathana korise, “Probhu, apuni sorgo aru prithibi bonaise aru samundar te ki ase sob bonai diya Probhu Isor hoi. <sup>25</sup> Apuni ekjon ase jun he Pobitro Atma pora Apuni laga noukar laga mukh pora koise, moi khan laga baba David, ‘Ki nimite Porjati manu khan khong uthise, Aru manu khan misa kotha khan kele bhabi thake?’  
<sup>26</sup> ‘Prithibi laga raja khan uthi khara hoise, Aru cholawta khan eke logote joma hoise,

Probhu laga bhirodh te aru Khrista laga bhirodh te<sup>†</sup>.

<sup>27</sup> Hosa pora, Herod aru Pontius Pilate, dusra jati aru Israel laga manu khan, sob eke logote joma hoi kene Apuni laga pobitro noukar junke Apuni asirbad korise taike manu khan pora hinsa korise‡. <sup>28</sup> Aru taikhan sob joma korise aru Apuni laga hath pora ki kori bole itcha asele etu sob poila pora hobo koi kene thakise. <sup>29</sup> Etiya, Probhu, taikhan laga dhomki ke sabi, aru Apuni laga noukar laga mon dangor kori dibi Apuni laga kotha bhoi nakorikena kobole nimite. <sup>30</sup> Etu karone Apuni laga hath changai kori bole nimite khuli dibi, aru Apuni laga pobitro noukar Jisu laga naam te asurit kaam kori bole nimite.”

<sup>31</sup> Aru jitia taikhan prathana kori khotom hoise taikhan jun jagate thakise etu hili bole shuru hoise, aru taikhan sob Pobitro Atma pora bhorta hoi jaise, aru taikhan bhoi nakori kene Isor laga kotha manu khan ke koise.

### *Sampoti Sob Taikhan Eke Laga Hoise*

<sup>32</sup> Aru jiman manu biswas te joma hoi thakise taikhan sob mon aru bhabona sob eke hoi thakise, aru kun pora bhi nijor laga dhun sompoti etu moi laga ase koi kene kowa nai kintu ekjon-ekjon logote bhag korise. <sup>33</sup> Aru apostle khan dangor takot pora, Probhu Jisu jinda hoise koi kene gawahi di thakise, aru taikhan sob logote Isor laga anugrah thakise. <sup>34</sup> Aru taikhan majote kun bhi dukh nathaka hoise, kelemane kun logote kheti, ghor aru saman ase, tai etu

---

† **4:26** 4.26 Psa. 2:1-2. ‡ **4:27** 4.27 Isa. 61:1.

sob bikiri kori kene etu laga daam ani di thakise. <sup>35</sup> Aru apostle khan laga theng nichete ani kene rakhi diye, aru taikhan kunke ki dorkar ase etu saikene bhag kori diye.

<sup>36</sup> Titia Joseph, taikhe Barnabas koi kene apostle khan pora mate -Mon Dangor Kori Diya Putro bhi mate-, ekjon Levite, jonon pora Cyprus majuli laga manu, <sup>37</sup> tai laga ekta kheti thakise etu bikiri kori kene poisa anise aru apostle khan laga theng te rakhidise.

## 5

### *Ananias Aru Sapphira*

<sup>1</sup> Etiya ekjon manu Ananias, aru tai laga maiki Sapphira duijon mili kene chutu ekta mati bikiri korise, <sup>2</sup> Aru tai laga maiki logote kotha milai kene adha poisa rakhi loise, aru adha poisa jai kene apostle khan laga theng te rakhidise.

<sup>3</sup> Kintu Peter koise, “Ananias, kele Saitan pora tumi laga mon to Pobitro Atma ke misa kobole bhorta kori dise aru ki bhikai se etu laga adha daam tumi kele loi rakhise? <sup>4</sup> Jitia mati tumi logote bikiri nohoi kene thakise, titia mati to tumi laga he thakise nohoi, aru jitia bikiri hoi jaise, tumi jani kene bikiri kora nohoi? Tumi laga monte kineka etu bhabise? Tumi manu ke misa kowa nai, kintu Isor ke he misa koi ase.” <sup>5</sup> Jitia Ananias etu kotha hunise, tai giri kene ta te mori jaise, aru jun etu kotha hunise sob bhoi lagi jaise.

<sup>6</sup> Aru taikhe uthaikene jawan khan ahi kene kapra pora bandhi dise, aru loijai kene, matite hali dise.

<sup>7</sup> Aru tin ghanta pichete, tai laga maiki ahise, hoilebi tai to ki hoise etu najani kene thakise.

<sup>8</sup> Titia Peter taikhe jawab dise, “Amike kobi, tumi etu mati iman pora bikiri korise na nohoi.” Titia tai koise “Hoi, iman pora he bikiri korise.” <sup>9</sup> Titia Peter taikhe koise, “Tumi duijon mili kene Isor laga Atma ke porikha kori bole kene bhabise? Sabi, tumi laga mota ke matite hali diya manu khan dorja usorte khara kori ase, aru tumike bhi uthai loijabo.” <sup>10</sup> Titia tai etu homoi te Peter laga theng nichete giri kene mori jaise, aru jitia jawan khan bhitor te ahise, taikhe mora paise, aru bahar te loijai kene tai laga mota usorte dabai dise. <sup>11</sup> Aru jiman manu girja te thakise aru etu kotha hunise, taikhan sob bisi bhoi lagi jaise.

### *Chihna Aru Chihna Kaam Bisi Kora*

<sup>12</sup> Aru apostle khan laga hath pora chihna kaam manu usorte bisi kori thakise, aru biswasi khan sob eke mon hoi kene Solomon laga Veranda te joma hoise. <sup>13</sup> Kintu taikhan logote abiswasi khan to kaam kori bole mon dangor thaka nai; hoilebi manu khan\* pora taikhan ke bisi sonman di thakise. <sup>14</sup> Probhu laga naam te mota aru mahila khan bisi joma hoise, aru biswas khan logot mili kene ekta mon pora kaam korise, <sup>15</sup> etu karone manu khan bisna uthaikene bemaar manu ke rasta te loijai kene rakhidise, jitia Peter ta te ahibo, tai laga chaya bemaar manu khan uporte lagi kene changai pai jabo. <sup>16</sup> Aru Jerusalem usorte thaka nagar khan pora manu khan bemaar aru biya atma pora dukh di thaka khan loi ani joma kori dise, aru sob manu jiman ahise bhal hoi jaise.

---

\* **5:13** 5.13 Jersuaalem sheher laga manu khan.

### *Apostle Khan ke Dhurikena Aru Chari Diya*

<sup>17</sup> Kintu maha purohit khara hoi jaise, aru jun manu tai logote thakise taikhan bhi uthijaise - Sadducee khan laga ekta dol-; aru taikhan etu saikene jolon hoise <sup>18</sup> aru apostle khan ke dhori kene bondhi ghor te rakhidise. <sup>19</sup> Kintu etu rati te Probhu laga sorgodoth ahi kene bondhi ghor laga dorja khuli dise, aru taikhan ke bahar ulai dise, aru koise, <sup>20</sup> "Jabi aru khara kori kene mondoli bhitor te jiman manu ase taikhan ke jibon laga kotha koi dibi." <sup>21</sup> Aru jitia taikhan etu hunise, taikhan phojurte mondoli bhitor te jai kene sikhaise. Kintu maha purohit aru jiman manu tai logote thakise taikhan bhi ahise, aru Israel laga bacha khan laga dangor chokra khan ke sabha te eke logote matise, aru bondhi ghor pora apostle khan ke loi anibole nimite pathaise. <sup>22</sup> Kintu jitia daruga khan bondhi ghor te jaise, taikhan ke pa-a nai, titia taikhan wapas jai kene khobor dise. <sup>23</sup> Koise, "Amikhan jai kene saise, bondhi ghor bahar te sipahi khan bhi ta te khara kori thakise, kintu jitia amikhan Khuli Kena bhitor te jaise, ta te kunte bhi panai." <sup>24</sup> Jitia mondoli laga cholawta aru moha purohit khan etu kotha hunise, taikhan asurit hoise, aru bhabise etu kineka hoi jaise. <sup>25</sup> Titia kunba ahi kene taikhan ke koise, "Sabi, apnikhan kunte bondhi ghor te hali dise, taikhan to mondoli te khara kori kene manu khan ke sikhai ase." <sup>26</sup> Titia cholawta aru daruga khan jaise, aru taikhan ke loi anise, kintu taikhan eku kora nai, kelemane manu khan pora taikhan ke pathor maribo jodi taikhan pora apostle khan ke dukh

dise koile. <sup>27</sup> Aru jitia taikhan ke anise, sabha usorte khara kori bole dise. Titia maha purohit pora taikhan ke hudise, <sup>28</sup> aru koise, “Amikhan koi dise apuni khan etu naam loi kene nasikhabi, kintu, tumikhan Jerusalem to pura tumikhan laga kotha pora bhorta kori dise, aru etu manu laga khun moi khan uporte hali bole bisari ase.” <sup>29</sup> Kintu Peter aru apostle khan koise, “Manu laga kotha huna pora to amikhan Isor laga kotha he poila manibo lage. <sup>30</sup> Amikhan laga baba khan laga Isor he Jisu ke jinda kori dise, junke apnikhan khuri te latkai kene morai dise. <sup>31</sup> Isor he Taike Probhu aru Tran-Korta bonai kene Tai laga dyna hathte rakhi loise, aru Israel manu khan ke notun jibon dibo aru paap pora mukti pabo. <sup>32</sup> Aru amikhan etu kotha laga gawahi ase, aru Isor Tai laga kotha mani thaka khan ke dibole Pobitro Atma bhi etu kotha laga sakhi ase.

<sup>33</sup> Jitia sabhakan etu kotha hunise, taikhan bisi khong uthise, aru apostle khan ke morai dibole mon hoise.” <sup>34</sup> Kintu sabha te ekjon Pharisee thakise, tai laga naam Gamaliel thakise, ekjon niyom jana manu, aru sob manu pora taike adar kore, tai khara kori kene apostle khan ke olop deri nimite bahar te loi jabile koise. <sup>35</sup> Aru taikhan ke koise, “Israel laga manu, moi ki koi ase etu bhal pora huni bhi aru tumikhan etu manu khan logote ki kori bole lage. <sup>36</sup> Keleman bisi sal age te, Theudas uthi kene tai kunba ekjon ase koise, aru charsoh nisena manu tai laga pichete jaise, taike morai dise, aru jun manu tai laga pichete jai thakise taikhan bhi sob alag-alag hoi jaise. <sup>37</sup> Etu pichete Galilee pora Judas

koi kene ekjon uthise, tai bhi manu khan ke chela bonai loise le, kintu tai bhi harai jaise, aru jiman taike mani thakise taikhan sob alag-alag hoi jaise. <sup>38</sup> Etiya moi apnikhan ke koi ase, eitu khan pora dur thakibi aru taikhan ke chari dibi, kelemane jodi etu dhorom aru kaam to manu pora ase koile, taikhan bhi khotom hoi jabo. <sup>39</sup> Kintu jodi Isor pora ase koile, tumikhan taikhan ke kitia bhi hata bona paribo; aru tumikhan nijor Isor logote lorai kori thaka nisena hobo.” <sup>40</sup> Titia taikhan apostle khan ke matise aru mari kene taikhan ke Jisu laga naam aru nolobole koise, aru jabole dise. <sup>41</sup> Taikhan sabha pora ulai jaise aru Jisu laga naam nimite, dukh paise koi kene khushi pora jaise. <sup>42</sup> Aru etu pichete, mondoli te bhi aru ghor-ghor te jai kene Jisu Khrista laga susamachar manu khan ke prochar kori thakise.

## 6

### *Sewa Karone Sat Jon Basi Luwa*

<sup>1</sup> Aru etu dinte, jitia chela khan bisi hoi thakise, titia Yunani khan, Yehudi khan ke bhirodh kori thakise, kelemane mota morija maiki khan ke kha luwa bhag kora homoi te hisab nakore koi kene taikhan biya pai thakise. <sup>2</sup> Titia baroh ta chela khan pora taikhan pichete aha khan ke koise, “Etu amikhan nimite thik nohoi Isor laga kotha chari kene kha luwa laga bhag kori thaki te jabo nalage. <sup>3</sup> Etu karone bhai khan, apnikhan majote sat jon bhal manu khan ke basi lobi, Pobitro Atma aru gyaan thaka, junke amikhan

etu kaam nimite basi lobo. <sup>4</sup> Kintu amikhan hodai prathana kori thakibo aru Isor laga kotha aru kaam te age jai thakibo.” <sup>5</sup> Taikhan laga kotha sob manu khan pora bhal paise. Aru taikhan Stephen ke basi loise jun dhormik aru Pobitro Atma pora bhorta thakise, aru Philip, aru Prochorus, aru Nicanor, Timon, Parmenas, aru Nicolaus, Yehudi niyom mani thaka Antioch pora aha ekjon. <sup>6</sup> Taikhan ke apostle usorte anise, aru apostle khan pora hath dikene taikhan uporte prathana kori dise.

<sup>7</sup> Titia Isor laga kotha khuli prochar hoi jaise, aru biswasi khan bisi-bisi hoi thakise aru Jerusalem te purohit khan bhi bisi manu biswasi khan logot mili jaise.

### *Stephen Ke Dhori Luwa*

<sup>8</sup> Etiya Stephen pura takot aru anugrah te bhorta hoi kene manu usorte dangor asurit kaam kori thakise. <sup>9</sup> Kintu mondoli te Freedmen koi kene kunba uthise, aru Cyrenia aru Alexandria manu, aru Cilicia aru Asia pora kunba ahi kene Stephen logote kotha pora lagi jaise. <sup>10</sup> Kintu taikhan Stephen to gyaan aru Pobitro Atma pora kotha kowa dikhi kene tai uporte jiti bole para nai. <sup>11</sup> Titia taikhan poisa dikene manu khan ke kobole koise, “Amikhan Stephen pora Moses aru Isor laga biya kotha koi thaka hunise.” <sup>12</sup> Aru taikhan pora bura khan aru niyom likha khan laga mon ulta kori dise aru Stephen ke dhurikena taike sabha usorte tani kene loi anise. <sup>13</sup> Taikhan misa gawahi diya manu bhi loi anise, aru koise, “Etu manu to amikhan laga pobitro jaga aru niyom laga bhirodh te biya kotha kobole

narukhe. <sup>14</sup> Kelemanee amikhan tai pora etu kowa hunise, Nazareth laga Jisu pora etu jaga khotom kori dibo, aru Moses ki niyom amikhan ke dise etu sob bodli kori dibo.” <sup>15</sup> Aru jiman manu sabha te bohi thakise sob Stephen ke he saise, aru tai laga chehera to sorgodoth laga chehera nisena dikhise.

## 7

### *Stephen Laga Kotha*

<sup>1</sup> Titia maha purohit pora hudise, “Etu kotha khan hosa ase? <sup>2</sup> Titia Stephen koise,

“Bhai khan aru baba khan, moi laga kotha huni bhi: Isor laga mohima baba Abraham logote ahise jitia tai Mesopotamia te thakise, tai Haran te nathaka age pora; <sup>3</sup> aru taikhe koise, ‘Tumi laga mati aru ghor manu khan pora ulai jabi, aru moi jun jaga tumike dikha bo ta te jabi.’ <sup>4</sup> Titia Abraham pora Chaldea laga desh chari kene Haran te thaki jaise; aru tai laga baba mora pichete, Isor pora taikhe etu jagate loi anise, jun jagate tumikhan etiya thaki ase. <sup>5</sup> Kintu Tai taikhe etu jaga diya nai, tai laga theng rakhibole bhi diya nai. Kintu Isor pora taikhe aru tai laga khandan ke, ekta jaga dibo koi kene kosom dise, tai laga bacha nathaka hoilebi. <sup>6</sup> Kintu Isor pora taikhe eneka koise, tai laga khandan khan dusra desh te alag manu hoi kene thakibo, aru etu jaga laga manu khan taikhan ke nokor bonai rakhibo aru charsoh saal tak bisi dukh dibo. <sup>7</sup> ‘Aru,’ Isor koise, ‘jun jati taikhan ke nokor banabo, utu jati khan ke moi bisar koribo, titia taikhan ulai ahi kene moike etu jagate mohima koribo.’ <sup>8</sup> Titia

Isor pora Abraham ke sunnot laga kosom dise, titia Abraham, Isaac laga baba hoise aru ath-dinte Isaac ke sunnot korise; aru Isaac pora Jacob laga baba hoise, aru Jacob pora baroh ta bacha paise aru etu khandan laga baba hoise. <sup>9</sup> Kintu Joseph laga bhai khan tai uporte ke suku jolise, aru taikhe Egypt te bikiri kori dise; kintu Isor tai logote thakise. <sup>10</sup> Aru Isor pora tai laga dukh sob pora bachai loise. Tai laga gyaan pora Egypt raja Pharaoh laga mon jiti loise, aru raja pora taikhe Egypt aru tai laga ghor uporte Governor bonai dise. <sup>11</sup> Titia Egypt aru Canaan desh te akaal ahise, aru bisi dukh paise, aru amikhan laga baba khan khabole panai. <sup>12</sup> Kintu jitia Jacob hunise Egypt te dhaan ase koi kene, tai amikhan laga baba khan ke ta te pathaise. <sup>13</sup> Aru dusra bar Joseph nijor bhai khan ke tai kun ase utu janibole dise, aru Pharaoh bhi Joseph laga ghor manu khan ke jani loise. <sup>14</sup> Titia Joseph tai laga kokai khan logote manu pathai kene Jacob aru tai logote pachatar jonke loi kene Egypt te anibole pothaise. <sup>15</sup> Titia Jacob Egypt te jaise, Jacob aru amikhan laga baba khan sob ta te morise. <sup>16</sup> Aru taikhan laga mora gaw to Shechem te loijai kene kote Abraham pora Hamor bacha khan logote poisa dikene mati kini rakhise ta te kobor dise. <sup>17</sup> Jitia Isor pora Abraham logote kosom khai kene rakha homoi ahise- etu kosom juntu Isor he Abraham logote korise- Egypt te manu bisi hoi jaise. <sup>18</sup> Joseph ke najana ekjon raja Egypt te ulaise. <sup>19</sup> Tai amikhan laga manu ke thogai dise, aru jiman notun jonon huwa bacha khan

ase taikhan ke ulai anibole koise ta te taikhan eitu khan ke jinda thaki bole nadibo. <sup>20</sup> Etu homoi te Moses jonom hoise; tai Isor nimate bisi sundur thakise, aru taikhe tin mohina tak tai baba ghor te rakhise. <sup>21</sup> Kintu jitia taikhe bahar te rakhise, Pharaoh laga swali pora taikhe loi kene nijor bacha nisena palise. <sup>22</sup> Aru Moses ke Egypt laga gyaan aru niyom sob sikhai dise, aru tai kotha aru kaam te bhi bisi takot thakise. <sup>23</sup> Kintu jitia tai chalis saal hoi jaise, tai nijor Israel bhai khan ke lok kori bole mon korise. <sup>24</sup> Aru ek din, jitia Israel manu ekjon ke dukh pai thaka dikhise, Moses etu manu ke modot kori bole jaise, aru etu dikhi kene Moses pora etu Egypt manu ke morai dise. <sup>25</sup> Tai bhabisele, tai laga bhai khan bujhi bo paribo, Isor he taikhan ke bachai dibo nimate taikhe pathaise, kintu taikhan etu bujhi bo para nai. <sup>26</sup> Aru dusra dinte duijon Israel manu jhagara kori thaka homoi te tai ponchise, aru ekjon-ekjon logote shanti rakhibole koise, 'Bhai khan, kele nijor bhai kokai majote jhagara kori ase?' <sup>27</sup> Kintu jun tai usorte manu logot jhagara kori thakise, Moses ke pichete dhakai kene, koise, 'Tumike kun pora amikhan uporte hukum chola bole dise?' <sup>28</sup> Juwa kali ekjon Egypt manu ke morai diya nisena, moike bhi mora bole mon ase?' <sup>29</sup> Etu kotha huni kene Moses polai jaise, aru Median laga desh te alag desh manu hoi kene thaki jaise, aru ta te tai duita chokra bacha laga baba hoi jaise. <sup>30</sup> Aru jitia chalis saal paar hoi jaise, Probhu laga sorgodh Sinai Pahar laga jongol te jui nisena kori kene tai usorte ahise. <sup>31</sup> Jitia Moses jui dikhise, tai etu

dikhi kene bisi asurit hoise, aru usor pora sabole jaise, titia Probhu laga awaj hunise. <sup>32</sup> 'Moi tumi laga baba khan laga Isor ase, Abraham, Isaac aru Jacob laga Isor.' Titia Moses kapi kene bhoi pora ta te phale sabole para nai. <sup>33</sup> Titia Probhu\* taike koise, 'Tumi laga theng pora juta ulai rakhi dibi, kelemane kuntu jagate tumi khara ase etu jaga Pobitro ase. <sup>34</sup> Ami laga manu khan Egypt te dukh kori thaka Moi dikhise, aru taikhan kandi thaka awaj hunise, aru taikhan ke bacha bole nimite Moi ahise; etu karone ahibi, Moi tumike Egypt te pathabo.' <sup>35</sup> Etu Moses, junke Israel manu khan pora grohon kora nai, tai koise, 'Kun he tumike moi khan uporte cholawta koribo dise?'- Tai ekjon thakise junke Isor pora cholawta bonaise aru bachai dibole nimite pathaise- aru sorgodoth hath pora Moses ke jongol te dikhai dise. <sup>36</sup> Moses pora he Egypt pora taikhan ke ulai anise, aru sob asurit kaam khan Egypt laga matite dikhai thakise aru Ghar laga Samundar te, aru jongol majot pora taikhan ke chalis saal tak cholai kene loi jaise. <sup>37</sup> Etu Moses he ase, jun Israel khan ke koise, 'Isor pora tumikhan nimite tumikhan laga bhai kokai khan majot pora ekjon moi nisena bhabobadi ulai dibo.' <sup>38</sup> Etu tai ase, jongol te thaka homoi te, Sinai Pahar te sorgodoth logot kotha korise, aru kun amikhan baba laga baba khan logot asele, aru utu tai ase jun pora jinda kotha paikene amikhan ke ponchai dise. <sup>39</sup> Etu manu laga kotha moi khan laga baba laga baba khan mani bole mon

---

\* **7:33** 7.33 Yate, Probhu to Isor ke koi ase.

kora nai, kintu taike hatai dise, aru taikhan laga mon Egypt phale jai jaise. <sup>40</sup> Aru Aaron koise, 'Amikhan nimate murti khan bonai dibi jun amikhan ke loi kene age jabo. Aru etu Moses, jun he amikhan ke Egypt pora loi anise, taike ki hoise amikhan najane.' <sup>41</sup> Titia taikhan ekta goru bacha bonaise, aru hath pora bona laga murti ke kiba ani kene boli dise, aru khushi manai thakise. <sup>42</sup> Kintu Isor taikhan ke chari kene akas aru tara khan ke puja kori bole dise, jineka bhabobadi khan laga kitab te likha ase, 'Tumikhan moike janwar laga boli diya nai Chalis saal jongol te thaka homoi te, tumi Israel manu khan kotha manise?'

<sup>43</sup> Apuni khan Molech laga tambu ke mani loise, Aru tumikhan laga bhagwan Rephan laga tara bhi, aru murti bonai kene puja kori bole loi jaise karone:

Moi tumikhan ke Babylon pora bisi dur te loi rakhidibo.'

<sup>44</sup> Ami laga baba laga baba khan logot sakhi laga tambu ase, jineka taike dikhaise jongol te, tineka bona bole koise, aru thik tineka bonai loise.

<sup>45</sup> Etu ase tombu ghor juntu amikhan baba khan pora paikene Joshua hath pora loi yate anise, jitia taikhan desh khan ke gheri loi kene kabja kori loise, jun khan Isor he amikhan laga baba khan usor pora khedai dise, aru David raja laga homoi tak thakise, <sup>46</sup> jun Isor itcha te paise, tai mangise Jacob laga Isor ke thaki bole ekta jagah karone. <sup>47</sup> Kintu Solomon he Isor karone ekta ghor bonai dise. <sup>48</sup> Kintu, Mohan Isor to manu pora bonai diya ghor te nathake, bhabobadi pora kowa nisena,

<sup>49</sup> ‘Sorgo to Ami laga singhason, aru prithibi Ami laga theng rakha jaga.

Probhu koise, tumi Moi karone ghor bonai dibo? Aru Ami laga aram kora jaga to kote hobo?

<sup>50</sup> Moi he nijor hath pora etu sob bona nai naki?’

<sup>51</sup> Tumikhan phutani aru mon aru kaan te sunnot nakora khan, tumikhan Pobitro Atma laga hinsa kori thake, tumikhan baba laga baba khan kori aha nisena, tineka apuni khan bhi kore.

<sup>52</sup> Eneka kun bhabobadi ase junke tumikhan laga baba pora dukh diya nai? Taikhan pora ahibole thaka Dharmik Jon Jisu laga kotha kowa manu khan ke bhi morai dise, aru tumikhan bhi morai diya aru thogai diya khan hoi jaise, <sup>53</sup> Tumikhan sorgodoth khan pora diya Isor laga niyom luwa khan, hoilebi tumikhan manibo para nai.”

### *Pathor Pora Stephen Ke Morai Diya*

<sup>54</sup> Jitia taikhan etu kotha hunise, sabha laga manu khan monte bisi khong hoise, aru dath kamuri kene Stephen uporte khong uthise. <sup>55</sup> Kintu tai Pobitro Atma te bhorta hoi kene, sorgote saise, aru Isor laga mohima aru Jisu to Isor laga dyna hath phale khara thaka dikhi paise.

<sup>56</sup> Stephen pora hala kori kene koise, “Sabi, sorgo khuli thaka dikhi ase, aru Manu laga Putro Isor laga dyna hath phale khara kori ase.” <sup>57</sup> Titia taikhan untcha awaj pora hala korise, aru kaan bondh kori kene sob eke logot tai usorte polai ahise. <sup>58</sup> Aru taikhan taike sheher bahar te loijai kene taike pathor mari dise, aru gawahi khan taikhan laga kapra loise aru jawan manu ekjon naam Saul laga bhori te rakhise. <sup>59</sup> Aru taikhan

jitia Stephen ke pathor mari thakise, tai Isor ke mati kene koise, “Probhu Jisu, moi laga Atma loi lobi.” <sup>60</sup> Titia tai athukarikena jor awaj pora koise, “Probhu, taikhan ke etu paap laga bisar nokoribi.” Etu koi kene tai ghumai jaise.

## 8

### *Saul Pora Girja Nosto Kora*

<sup>1</sup> Saul bhi Stephen ke morai dibole monjur korise, aru etu dinte Jerusalem te thaka girja te bisi dukh digdar ahise; aru sob biswasi khan Judea aru Samaria te alag-alag jai jaise, khali apostle khan he thakise. <sup>2</sup> Biswasi manu khan pora Stephen laga gaw uthai loijai kene kobor dise, aru manu khan mon dukh korise. <sup>3</sup> Kintu Saul girja khan ke biya kori bole kosis kori thakise; aru ghor-ghor te jai kene, mota aru maiki sobke dhori kene bondhi ghor te hali dise.

### *Philip Pora Samaria Te Khrista Prochar Kora*

<sup>4</sup> Aru jun biswasi alag phale jai jaisele taikhan ja-a jaga sob te khushi laga khobor prochar kori thakise. <sup>5</sup> Titia Philip Samaria sheher te jai kene manu khan ke Khrista laga kotha prochar kori dise. <sup>6</sup> Aru Philip ki kotha prochar korise, taikhan mon dikene hunise, aru tai kori diya asurit kaam khan dikhise. <sup>7</sup> Bisi manu bhitor te dusto atma khan thakise, aru eitu khan taikhan pora ulai jaise, jor pora hala kori kene. Bisi manu jothor aru lengra khan bhi changai paise. <sup>8</sup> Aru etu sheher manu khan bisi khushi korise.

### *Jadu Kora Simon Biswas Kora*

<sup>9</sup> Kintu ta te Simon koi kene ekjon manu thakise, tai jadu montor kori kene Samaria manu khan ke asurit kori dise, aru tai nijorke ekjon dangor manu ase koi thake. <sup>10</sup> Aru sob Samaria manu chutu pora dangor tak tai laga kotha bhal pora huni thakise aru koise, “Etu manu logote Isor laga takot ase.” <sup>11</sup> Tai laga kotha manu khan hune, kelemane bisi homoi pora tai jadu montor kori kene manu khan ke asurit kaam dikhai thakise, etu karone taikhan tai laga kotha mani thakise. <sup>12</sup> Kintu jitia taikhan Philip ke biswas korise, aru tai Isor laga rajyo kotha aru Jisu Khrista laga naam ke prochar korise, bisi mota aru maiki khan baptizma loise. <sup>13</sup> Titia Simon nijor bhi biswas korise, aru tai baptizma loi kene Philip logote thaki jaise, aru jitia asurit kaam khan kora dikhise, tai bisi khushi paise.

<sup>14</sup> Jitia Jerusalem te thaka apostle khan Samaria pora Isor kotha loise koi kene hunise, taikhan nimate Peter aru John ke pathaise. <sup>15</sup> Jitia Peter aru John ta te punchise, taikhan nimate prathana korise, taikhan Pobitro Atma pabo nimate. <sup>16</sup> Kelemane Pobitro Atma taikhan logote aha nai, kintu taikhan Probhu Jisu naam pora khali baptizma he loi kene thaka karone. <sup>17</sup> Titia Peter aru John taikhan uporte hath rakhi kene prathana kori dise, aru taikhan Pobitro Atma paise. <sup>18</sup> Aru jitia Simon dikhise apostle khan manu laga uporte hath rakhile Pobitro Atma pai ase, tai apostle khan ke poisa dibole bisarise. <sup>19</sup> Titia tai koise, “Moike bhi etu adhikar dibi, ta te moi jun uporte hath rakhibo tai Pobitro Atma pabo.” <sup>20</sup> Kintu Peter taike koise, tumi laga

poisa tumi logote khotom hoi jabo, kelemane tumi Isor laga bordan poisa pora kini bole bhabhi ase. <sup>21</sup> Tumi laga yate eku bhag aru hisa nai, kelemane Probhu usorte tumi laga mon thik nohoi. <sup>22</sup> Etu nimite mon ghura bhi aru biya bhabona pora ulabi, aru Probhu usorte prathana koribi, titia Tai pora tumi laga letera mon aru biya bhabona pora maph kori dibo pare. <sup>23</sup> Kelemane moi dikhi ase tumi laga biya bhabona aru paap pora bandi thaka mon to.” <sup>24</sup> Titia Simon koise, “Probhu logot moi nimite prathana kori dibi, apuni pora ki koise etu moi uporte nahibole nimite.”

<sup>25</sup> Jitia taikhan Isor kotha koi dise aru sakhi korise, Peter aru John wapas Jerusalem te jaise, aru Samaria manu laga bosti khan te jai kene Isor laga kotha prochar korise.

### *Philip Aru Ethiopia Laga Hijira*

<sup>26</sup> Titia Probhu laga sorgodoth Philip logote kotha korise, aru koise, “Uthibi aru dakshin laga rasta jun to Jerusalem hoi kene Gaza te jai ta te jabi.”- Etu rasta balu laga jaga pora jai. <sup>27</sup> Titia tai uthi kene jaise. Aru ta te Ethiopia laga ekjon hijira manu thakise, tai ekjon dangor adhikar chola manu thakise, tai Candace, Ethiopia laga rani laga dhun sampoti sa-a manu asele, aru tai mohima kori bole Jerusalem te jai thakise. <sup>28</sup> Aru tai laga ghora gaari te bohi kene wapas ghor te jai thakise, aru Isaiah bhabobadi laga kitab porhi thakise. <sup>29</sup> Titia Atma pora Philip ke koise, “Jai kene ghora gari usorte bohobi.” <sup>30</sup> Titia Philip tai usorte polaikene jaise, aru Tai Isaiah bhabobadi

laga kitab porhi thaka hunise, aru koise, “Tumi ki porhi ase etu bujhi pai ase?” <sup>31</sup> Titia tai koise, “Moi kineka janibo, jitia tak moike kunba pora nashikai?” Titia tai Philip ke ghora gari te bohi bole matise. <sup>32</sup> Etiya jun to kitab Ethiopia manu pora porhi thakise etu eneka thakise,

“Taike ekta mer bolidan dibole nisena loi jaise, Aru jineka mer bacha pora chuli kata manu usorte chup-chap pora bohe,

Etu nisena, aru Tai pora Tai laga mukh khula nai.

<sup>33</sup> Tai laga bisar sorom khilai dikene Tai usor pora loi jaise.

Kun Tai laga manu khan ase koi kene kobo pare? Keleman Tai laga jibon to etu duniya pora uthai loise.”

<sup>34</sup> Titia hijira pora Philip ke hudise, “Moi apuni ke anurodh kori ase, kun bhabobadi laga kotha koi ase, tai nijor laga koi ase, na dusra manu laga kotha koi ase?” <sup>35</sup> Titia Philip tai mukh khuli se, aru Isor kotha pora shuru kori kene, Jisu laga kotha taike prochar korise. <sup>36</sup> Taikhan rasta te jai thaka homoi te pani thaka jagah ponchise, titia hijira pora koise, “Sabi, yate pani ase, moike baptizma lobole nimate ki pora rukhai ase?”

<sup>37</sup> Titia Philip pora koise, “Jodi tumi mon pora biswas kore, baptizma lobo pare.” Titia tai koise, “Moi biswas kore Jisu Khrista Isor laga chokra ase koi kene.” <sup>38</sup> Titia tai ghora gari ke rukhibole hukum dise. Aru Philip aru hijira duijon panite namikene jaise, aru Philip pora taike baptizma dise. <sup>39</sup> Jitia taikhan pani pora ulai ahise, Probhu laga Atma pora Philip ke loi jaise, titia hijira taike aru dikha nai, kintu tai bisi khushi pora jai jaise.

<sup>40</sup> Kintu Philip to Azotus te ahise, aru pura jagate tai jaise, jitia tak tai Caesarea puncha nai, tai sob sheher khan te jai kene Isor laga kotha prochar korise.

## 9

### *Saul Mon Bodli Huwa*

<sup>1</sup> Kintu Saul, Probhu laga chela khan ke morai dibo koi kene kotha kori thakise aru tai moha purohit logote jaise <sup>2</sup> aru tai moha purohit logote chithi mangise Damascus sheher laga mondoli khan nimite, jodi tai rasta te jai thaka homoi te kunba manu pai, mota aru mahila hoilebi, eitu khan ke dhori kene Jerusalem te loi jabile. <sup>3</sup> Jitia tai safar te jai thakise, Damascus te punchibole usor huwa homoi te, achanak sorgo pora ujala hoi kene ekta puhor tai uporte jolise; <sup>4</sup> aru titia tai matite giri jaise, aru ekta awaj taike koi thaka hunise, "Saul, Saul, kele tumi Moike dukh di ase?" <sup>5</sup> Aru titia Saul hudise, "Apuni kun ase Probhu?" Aru Probhu jowab dise, "Moi Jisu ase junke tumi dukh di ase; pathor te theng marile nijor he jokhom pabo." <sup>6</sup> Titia tai asurit hoise aru bhoi pora kapi kene koise, "Probhu moi ki kori bole lage?" Titia Probhu taike koise, "Uthibi aru Damascus sheher te jabi, aru tumi ki koribo lage etu sob tumike koi dibo." <sup>7</sup> Jun manu Saul logote jai thakise taikhan chup hoi jaise, taikhan awaj hunise, kintu kunke bhi dikha nai. <sup>8</sup> Titia Saul khara hoise, aru jitia tai laga suku khuli se, tai eku bhi dikhi bole napara hoise; titia taikhan tai laga hath dhori kene Damascus te loi jaise. <sup>9</sup> Aru

tai tin din suku andha hoi jaise aru eku dikhi bole para nai, aru kha luwa bhi kora nai.

<sup>10</sup> Damascus te ekjon chela Ananias koi kene thakise. Probhu pora taike darshan pora koise, “Ananais!” Titia tai koise, “Sabi, moi yate ase Probhu.” <sup>11</sup> Titia Probhu taike koise, “Uthibi, aru Sidha kowa rasta te jabi, aru Judas laga ghor te jai kene ekjon manu Saul, Tarsus sheher pora aha, ase na nai hudibi, kelemane tai prathana kori ase. <sup>12</sup> Aru tai darshan te ekjon manu Ananias koi kene dikhise, aru tai uporte te hath rakhi kene thaka dikhise, etu pora tai aru dikhibo paribo.” <sup>13</sup> Kintu Ananias koise, “Probhu, moi etu manu laga kotha bisi manu pora hunise, tai Jerusalem te kiman pobitro manu ke dukh dise. <sup>14</sup> Tai moha purohit khan pora adhikar loise aru jun manu apuni laga naam lobo taike bondhi ghor te hali dibo.” <sup>15</sup> Kintu Probhu taike koise, “Jabi, kelemane tai Moi laga basi luwa kaam kora manu hobo, tai he moi laga naam Porjati khan ke, raja khan ke aru Israel laga bacha khan ke koi dibo; <sup>16</sup> kelemane Moi taike dikhai dibo, tai moi laga naam nimate ki dukh uthabo lagibo.” <sup>17</sup> Aru Ananias etu ghor te jaise, aru tai laga hath Saul uporte rakhi kene koise, “Bhai Saul, Probhu Jisu pora tumi rasta te ahi thaka homoi te dikhai dise, Tai moike tumi usorte pathaise, tumi aru dikhibo aru Pobitro Atma pora bhorta hobo.” <sup>18</sup> Etu homoi te Saul laga suku pora kiba chamra nisena giri jaise, aru tai dikhi bole parise, aru tai uthi kene baptizma loise; <sup>19</sup> aru tai bhat khai kene takot paise.

### *Saul Pora Jisu Ke Prochar Kora*

Aru tai chela khan logote Damascus te olop din thakise. <sup>20</sup> Tai joldi mondoli khan te jai kene Khrista Isor laga Putro ase koi kene prochar korise. <sup>21</sup> Aru jun manu tai laga kotha hunise sob manu asurit hoi kene koise, "Jerusalem te Khrista naam loi thaka khan ke dukh diya to etu manu nohoi? Aru yate tai yate aha to taikhan ke bandi kene moha purohit khan logot loi jabile ahise." <sup>22</sup> Kintu Saul aru bisi mon dangor hoise, aru Damascus te thaka Yehudi khan nimite ekta chinta hoi jaise aru Jisu he Khrista ase koikena prochar kori thakise.

### *Damascus Pora Saul Polai Juwa*

<sup>23</sup> Kintu bisi din ja pichete, Yehudi khan Saul ke morai dibole kotha milai loise. <sup>24</sup> Kintu taikhan laga bhabona to Saul jani loise. Taike morai dibole nimite din raat dorja usorte te rukhi thakise. <sup>25</sup> Kintu tai laga chela khan rati huwa homoi te, taike ani kene tukri pora diwar niche korise aru paar kori dise.

### *Saul Jerusalem Te*

<sup>26</sup> Aru jitia Saul Jerusalem te ahise, tai chela khan logote mili bole kosis korise, kintu taikhan sob taike bhoi korise, tai bhi ekjon chela ase koi kene biswas kora nai. <sup>27</sup> Kintu Barnabas pora taike apostle khan logote loi jaise, aru Probhu pora kineka taike rasta te lok paise aru ki koise, aru tai Damascus te kineka mon dangor pora Jisu laga naam prochar korise, etu sob koi dise. <sup>28</sup> Titia tai chela khan logote Jerusalem te aha juwa korise. Aru tai mon dangor pora Probhu

laga naam loise. <sup>29</sup> Tai Greece te thaka Yehudi khan logot bhi kotha korise; kintu taikhan taike morai dibole kosis korise. <sup>30</sup> Jitia biswasi bhai khan etu janise, taike Caesarea te loijai kene Tarsus te pathai dise.

<sup>31</sup> Titia, Judea aru Galilee aru Samaria laga girja khan shanti te thakise; aru Probhu laga bhoi te thakise aru ekjon-ekjon ke Pobitro Atma pora mon dangor kori dise, aru girja laga ginti aru bhi bisi hoi jaise.

### *Aeneas ke Bhal Kora*

<sup>32</sup> Etiya eneka hoise, jitia Peter sob jagate safar korise, Lydda town te thaka Isor laga manu khan usorte bhi jaise. <sup>33</sup> Ta te tai Aeneas koi kene ekjon manu ke lok paise, tai bisna te ath saal pora ghumai thakise, aru tai jothor bemar thakise. <sup>34</sup> Peter taike koise, "Aeneas, Jisu Khrista tumike changai koridi ase, uthibi aru tumi laga bisna thik kori lobi," aru titia tai joldi uthijaise. <sup>35</sup> Titia Lydda aru Sharon te thaka manu khan taike dikhi kene mon ghuraise aru Probhu ke biswas korise.

<sup>36</sup> Joppa te Tabitha koi kene ekjon mahila chela thakise, jun laga motlob ase "Dorcas." Etu mahila sob bhal kaam kore aru gorib manu khan uporte bisi morom thakise. <sup>37</sup> Kintu tai bemar pora mori jaise, aru taike gaw dhulai dikene upor kamra te rakhise. <sup>38</sup> Aru Lydda jaga to Joppa usorte thakise, aru Peter ta te ase koi kene chela khan hunise, aru taikhan pora duijon manu ke tai logote anurodh kori kene pathaise, "Amikhan logote deri nohoi kene ahibi." <sup>39</sup> Titia Peter

uthi kene taikhan logot jaise. Jitia tai ponchise, taikhan pora taike upor kamra te loi jaise aru ta te sob bidhowa khan tai usorte khara kori kene kandi thakise, aru Dorcas pora tai jinda thaka homoi te taikhan nimite kapra bonai diya khan dikhai dise. <sup>40</sup> Kintu Peter taikhan sobke bahar jabo dise, aru tai athukari kene prathana korise. Titia, tai laga gaw phale saikene koise, “Tabitha, uthibi.” Tai suku khuli se, aru Peter ke dikhi kene tai bohi jaise. <sup>41</sup> Titia Peter tai laga hath dikene taike uthai dise; aru pobitro manu aru bidhowa khan ke jinda hoi juwa to dikhai dise. <sup>42</sup> Aru Joppa te thaka sob etu kotha jani loise, aru bisi manu Probhu ke biswas korise. <sup>43</sup> Peter bisi din Joppa te Simon koi kene ekjon manu ghor te thakise.

## 10

### *Peter Aru Cornelius*

<sup>1</sup> Titia ekjon manu Cornelius koi kene Caesarea te thakise, aru tai Italy laga Regiment te ekjon dangor henapoti thakise. <sup>2</sup> Tai aru tai laga ghor manu khan sob Isor ke bhoi kora khan thakise; aru tai manu khan ke poisa dikena modot kora manu asele, aru hodai Isor logote prathana kori thakise. <sup>3</sup> Ek din tin baji nisena te, tai ekta sapha sapna dikhise, Isor laga ekjon sorgodoth tai logote ahi kene koise, “Cornelius!” <sup>4</sup> Kintu Cornelius sorgodoth ke bhoi pora saikene hudise, “Ki ase, malik?” Titia sorgodoth pora taike koise, “Tumi laga prathana aru dukh manu ke modot kora to Isor pora dikhise. <sup>5</sup> Etiya Joppa te kunba manu pathai kene Simon, kunke Peter bhi mate,

taike anibi. <sup>6</sup> Tai Simon koi kene ekjon chamra ula kaam kora manu laga ghor te ase, tai laga ghor samundar kinar te ase.” <sup>7</sup> Jitia sorgodoth taike kotha koi kene jai jaise, Cornelius tai laga duijon noukar ke matise, aru bisi majote ekjon bhal sipahi jun taike sewa kore taike bhi mati anise. <sup>8</sup> Aru taikhan ke sob kotha koi diya pichete, Cornelius taikhan ke Joppa te pathaise.

### *Peter Pora Darshan Dikha*

<sup>9</sup> Etiya aru alag din ekta te, taikhan jai thaka homoi te ekta sheher te ponchise, Peter ghor uporte prathana kori bole jaise. <sup>10</sup> Titia tai bisi bhuk lagise, aru kiba khabole itcha thakise, kintu jitia manu khan bhat bonai thakise, tai ekta darshan dikhise, <sup>11</sup> aru tai akas pora kiba ekta saman aha dikhise, ekta dangor kapra, charta kinar pora bandhi kene prithibi nichete ahi thaka dikhise. <sup>12</sup> Aru ta te prithibi laga sob janwar charta theng thaka aru matite rengi kene choli thaka jongli janwar, aru akas laga chiriya khan sob thakise. <sup>13</sup> Aru titia ekta awaj taike koise: “Uthibi, Peter, aru mari kene khabi.” <sup>14</sup> Kintu Peter koise, “Nohobo Probhu, moi kitia bhi sapha nathaka aru letera saman khanai.” <sup>15</sup> Kintu aru ekbar awaj ahi kene koise: “Ki Isor pora sapha kori dise, etu ke letera ase nokobi.” <sup>16</sup> Aru eneka ti bar hoise; titia saman pora bhorta thaka sorgote wapas loi jaise.

<sup>17</sup> Titia Peter etu darshan laga ki motlob ase koi kene bisi chinta bhabona korise, etu homoi te, Cornelius pora kun manu ke pathaise taikhan ahi kene dorjate khara hoi thakise, taikhan ahi kene

Simon laga ghor kot te ase etu bisari kene ahise.

<sup>18</sup> Aru taikhan ahi kene matise, aru Simon kunke Peter bhi koi, tai ta te thaki ase na nai etu hudise.

<sup>19</sup> Etu homoi te bhi Peter to tai ki darshan paise etu bhabona kori thakise, titia Pobitro Atma pora taike koise, "Sabi, kunba manu tumike bisari ase.

<sup>20</sup> Uthibi aru taikhan logote jabi, eku bhabona nokoribi, kelemane moi he taikhan ke pathaise."

<sup>21</sup> Titia Peter niche kamra te namikene taikhan ke koise, "Sabi, tumikhan kunke bisari ase etu moi ase. Ki nimite tumikhan moike bisari kene ahise?"

<sup>22</sup> Aru taikhan koise, "Henapoti Cornelius jun dharmik manu ase, aru sob Yehudi desh manu khan pora tai laga bhal kotha he koi, pobitro sorgodoth pora etu ghor te apuni logote pathaise, apuni pora kowa kotha to huni bole nimite." <sup>23</sup> Titia Peter taikhan ke tai logote thaki bole matise.

Aru dusra dinte uthi kene taikhan logote jaise, aru Joppa pora kunba bhai khan bhi tai logote jaise. <sup>24</sup> Aru dusra dinte taikhan Caesarea te ponchise. Cornelius pora tai laga sathi aru ghor manu khan ke bhi mati kene rukhi thakise.

<sup>25</sup> Jitia Peter ghor bhitor te ahise, Cornelius ahi kene taike lok korise, aru taike aradhana kori bole Peter laga theng nichete girise. <sup>26</sup> Kintu Peter taike uthaikene, koise, "Uthibi! Moi nijor bhi ekjon manu he ase."

<sup>27</sup> Aru jitia Peter tai logote kotha kori thakise, tai jai kene manu bisi joma kori thaka paise. <sup>28</sup> Titia tai taikhan ke koise, "Apnikhan bhi jani ase, Yehudi manu dusra jati khan ke lok kora aru eke logote mili kene aha juwa kora niyom nai. Kintu Isor pora moike dikhaise aru koise kunke bhi letera aru

sapha nai eneka nokobi. <sup>29</sup> Etu nimate moi apuni khan logote eku nokoi kene ahise, jitia apuni pora moike mati bole pathaise. Etu karone moi hudise ki nimate moike lobole pathaise?" <sup>30</sup> Titia Cornelius koise, "Char din age te etu homoi te, moi ghor te prathana kori thakise; aru sabi ekjon manu moi usorte boga kapra lagai kene khara kori thakise. <sup>31</sup> Aru tai koise, 'Cornelius, tumi laga prathana huni loise, aru tumi gorib manu khan ke modot kora to Isor pora Tai usorte yaad kori ase. <sup>32</sup> Etu karone kunba ke Joppa te patha bhi, aru Simon junke Peter koi. Taike mati bhi, tai samundar kinar te chamra ula kaam kora manu Simon koi kene ekjon ghor te ase.' <sup>33</sup> Etu karone moi apuni ke lobole kunba manu pathaise. Aru apuni aha karone bisi bhal paise, aru etu karone, amikhan aji Isor usorte sob manu joma hoi ase, aru Probhu pora apuni ke ki koise etu huni bole nimate joma hoise."

### *Porjati Khan Pora Susamachar Huna*

<sup>34</sup> Titia Peter mukh khuli kene koise,  
 "Hosa pora, Isor to kun logote bhi alag pora nasai kintu Tai sobke eke morom kore. <sup>35</sup> Kintu, jun desh te hoilebi jun he Isor ke bhoi koribo aru Tai laga itcha pora kaam koribo tai uporte hodai Isor laga khushi thakibo. <sup>36</sup> Etu kotha Israel laga bacha khan nimate di pathaise, shanti laga susamachar Jisu Khrista dwara, kun he sob laga Probhu ase- <sup>37</sup> etu kotha aha to tumikhan bhi jani ase, aru sob Judea te bhorta hoijai ase, Galilee pora shuru kori kene, aru John pora baptizma kotha koi diya pichete; <sup>38</sup> aru Nazareth

Jisu laga kotha khan, kineka Pobitro Atma aru takot pora Taike Isor pora asirbad kori dise, jiman manu bhoot pora bandhi rakhise taikhan ke changai korise aru tai bhal kaam kori kene thakise, kelemane Isor tai logote asele. <sup>39</sup> Jisu ki korise moi khan sob etu laga gawahi ase, Yehudi khan laga desh sob jagah te, aru Jerusalem te ki-ki korise amikhan utu sob laga gawahi ase. Taikhan Taike Cross te latkai kene morai dise. <sup>40</sup> Kintu Isor Taike tin dinte jinda kori dise aru manu khan ke dikhai dise, <sup>41</sup> sob manu ke nohoi, kintu Isor poila pora basi luwa khan ke- moi khan pora jun Tai logote kha luwa korise Tai mori kene jinda huwa pichete. <sup>42</sup> Aru Tai moi khan ke sob manu khan logote jai kene Tai he Isor pora basi luwa ekjon ase aru mora aru jinda sob jati uporte bisar kora ekjon ase koi kene manu khan ke jonai dibi koise. <sup>43</sup> Jiman bhabobadi ase sob Tai laga gawahi he ase, jun manu Taike biswas kore Tai laga naam te sob manu paap pora maph pabo.”

### *Porjati Khan Logot Pobitro Atma Aha*

<sup>44</sup> Jitia Peter etu kotha khan koi thakise, jun manu tai laga kotha huni thakise taikhan uporte Pobitro Atma ahi jaise. <sup>45</sup> Aru Peter logot jiman sunnot kora biswasi khan ahise taikhan asurit hoi jaise, kelemane Pobitro Atma pora jati manu khan uporte bhi di dise. <sup>46</sup> Kelemane taikhan pora Porjati khan alag kotha kora aru Isor ke dhanyavad di thaka hunise. Titia Peter pora etu kotha koise, <sup>47</sup> “Kun pora taikhan ke baptizma lobole nadibo nimite pani pora dur

rakhibo paribo naki, amikhan sob Pobitro Atma pa nisena?” <sup>48</sup> Aru tai taikhan ke Jisu Khrista naam pora baptizma lobole koise, titia taikhe aru olop din taikhan logote thaki bole anurodh korise.

## 11

### *Mondoli Te Peter Prochar Kora*

<sup>1</sup> Titia apostle khan aru Judea te thaka biswasi bhai khan hunise Porjati khan bhi Isor laga kotha ke mani loise koi kene. <sup>2</sup> Aru jitia Peter Jerusalem te wapas ahise, jun khan sunnot koribo lage koi, taikhan logote kotha te laga lagi jaise; <sup>3</sup> taikhan koise, “Apuni khan sunnot nakora manu khan logote jai kene kha luwa korise!” <sup>4</sup> Kintu Peter taikhan ke bhal pora samjai kene koise, <sup>5</sup> Moi Joppa laga sheher te prathana kori thakise, titia moi upor pora saman nichete ahi thaka darshan te dikhise, ekta dangor kapra charta kinar pora bandi kene ahi thakise, etu moi logote ahise. <sup>6</sup> Moi etu ke bhal pora saikene bhabona korise. Moi duniya te charta theng thaka janwar dikhise, aru jongli janwar, matite jai thaka janwar aru akas laga chiriya khan dikhise. <sup>7</sup> Aru moike ekta awaj pora koise, “Uthibi, Peter; mari kene khabi!” <sup>8</sup> Kintu moi koise, “Nohobo, Probhu; moi kitia bhi pobitro aru sapha nathaka saman moi laga mukh te ghusa nai.” <sup>9</sup> Kintu dusra bar aru ekta awaj pora moike koise, “Ki saman Isor pora sapha ase koise, etu ke letera nokobi.” <sup>10</sup> Aru eneka tin bar hoise, titia sob saman akas te aru uthai loi jaise. <sup>11</sup> Aru etu homoi te, moi thaka ghor te tinjon manu ahikena khara hoise;

taikhan ke Caesarea pora moi logot pathaise. <sup>12</sup> Titia Pobitro Atma pora moike taikhan logote jabole koise, kintu taikhan kun ase etu moike koi diya nai, titia choi jon bhai khan moi logote jaise, aru moi khan etu manu laga ghor te jaise. <sup>13</sup> Titia tai pora amikhan ke koise kineka ekjon sorgodoth pora tai laga ghor te khara kori kene taike koise, "Joppa te manu ke pathabi aru Simon ke loi anibole kobi. <sup>14</sup> Tai tumike Isor kotha koi dibo, aru etu kotha huni kene tumi aru tumi laga ghor manu khan sob poritran pabo." <sup>15</sup> Aru jitia moi kotha koi thakise, Pobitro Atma taikhan logote ahi jaise, jineka shuru te amikhan logote ahisele. <sup>16</sup> Titia moike Probhu laga kotha yaad ahise, kineka tai John ke koise, "John pani pora baptizma diye; kintu tumikhan Pobitro Atma pora baptizma lobo." <sup>17</sup> Jodi Isor taikhan ke daan dise jineka amikhan ke bhi dise, juntu pora amikhan Probhu Jisu Khrista ke biswas kore, to moi kun ase, Isor laga kotha namanibole?" <sup>18</sup> Jitia taikhan etu kotha hunise, taikhan eku jowab diya nai, kintu taikhan Isor ke dhanyavad dise, aru koise, "Tinehoile Isor pora Porjati khan ke bhi notun jonom dise."

### *Antioch Te Khristan Mata*

<sup>19</sup> Stephen ke morai diya homoi te biswasi khan dukh pa-a pora alag-alag jagate jai jaise, taikhan Isor laga kotha koi kene Phoenicia, Cyprus, aru Antioch te khali Yehudi khan logote prochar kori thakise. <sup>20</sup> Kintu taikhan kunba manu khan Cyprus aru Cyrene laga manu thakise, aru taikhan Antioch te ahise aru Yunani manu khan logote bhi kotha korise, aru taikhan

ke Probhu Jisu laga prochar korise. <sup>21</sup> Aru Probhu laga hath taikhan uporte thakise; aru bisi manu, biswas kori kene, Probhu logot ahise. <sup>22</sup> Titia taikhan laga kotha Jerusalem te thaka girja khan pora hunise, aru taikhan Barnabas ke Antioch te pathai dise. <sup>23</sup> Jitia tai ahi kene Isor laga anugraha dikhise, tai khushi paise; aru taikhan laga mon dangor kori kene arubi pura mon pora Probhu logote thaki bole koise. <sup>24</sup> Kelemanee tai ekjon biswas te thaka aru Pobitro Atma pora bhorta kori kene thaka ekjon bhal manu thakise, aru bisi manu Probhu ke grohon korise. <sup>25</sup> Titia Barnabas to Saul ke bisari bole Tarsus te jaise. <sup>26</sup> Aru jitia taike paise, taike Antioch te loi anise. Aru eneka hoise, pura saal taikhan eke logote thakise aru girja te manu khan ke sikhai thakise, aru titia Antioch te poila bar chela khan ke Khristan khan koi kene matise. <sup>27</sup> Aru etu homoi te bhabobadi khan kunba Jerusalem pora Antioch te ahise. <sup>28</sup> Aru taikhan majot, Agabus koi kene ekjon khara hoi kene jineka pura duniya te bisi dangor akaal ahi-bole ase, Atma pora taike dikhai diya nisena bhabobani koise. Etu sob Claudius laga dinte hoise. <sup>29</sup> Titia chela khan, jun khan jabo paribo, taikhan jai kene Judea te thaka bhai khan ke modot pathai dibo nimite kotha korise. <sup>30</sup> Aru taikhan eneka korise; Barnabas aru Saul laga hath pora ta te thaka bura khan ke poisa pathai dise.

## 12

*James Shahid Huwa Aru Peter ke Bondhi ghor*

### *Te Rakha*

<sup>1</sup> Etu homoi te raja Herod pora girja manu kunba khan ke dhurise aru bisi digdar dise. <sup>2</sup> Aru tai John laga bhai James ke talwar pora morai dise. <sup>3</sup> Aru jitia Yehudi cholawta khan etu karone bisi khushi pa-a janise, tai Peter ke bhi dhori bole jaise. Aru etu homoi to khomir nadhala laga roti kha laga din khan thakise. <sup>4</sup> Jitia tai Peter ke dhori loise, taike bondhi ghor te hali dise, aru charta sipahi khan ke tai uporte sabole rakhidise; tai Peter ke Nistar Purbb dinte manu khan usorte ulaikene anibole bhabi thakise. <sup>5</sup> Etu homoi te, Peter ke bondhi ghor te rakhi thakise, kintu girja manu khan mon pora tai nimite hodai Isor logot prathana kori thakise.

### *Peter Ke Bachaise*

<sup>6</sup> Aru Peter ke Herod pora bisar nakora ek rati age te, Peter to duijon sipahi majote ghumai thakise, loha laga rusi duita pora bandi kene thakise, aru dorja usorte duijon sipahi taike rukhi thakise. <sup>7</sup> Titia, achanak pora Probhu laga sorgodoth tai usorte ahise, aru bondhi ghor bhitor te ujala pora bhorta hoi jaise. Tai Peter laga kona te marise, aru taike uthaikene koise, "Joldi uthibi," aru taike bandhi kene rakha luha rusi giri jaise. <sup>8</sup> Titia sorgodoth taike koise, "Kapra lagabi aru juta to lagai lobi." Peter eneka korise. Sorgodoth taike koise, "Bahar laga ki kapra ase etu lagabi aru moi laga piche ahibi." <sup>9</sup> Titia Peter sorgodoth laga pichete jaise. Kintu tai jana nai etu sob to hosa pora sorgodoth he kori ase. Tai darshan he dikhi ase bhabise. <sup>10</sup> Jitia taikhan poila thaka duijon sipahi aru

bahar te thaka duijon sipahi ke paar korise, taikhan loha laga ekta dorja usorte punchise juntu khuli kene taikhan sheher te jabo paribo; aru etu nijor pora khuli jaise. Titia taikhan ulaikene rasta nichete jaise, aru sorgodoth taike chari kene jai jaise. <sup>11</sup> Aru jitia Peter etu sob hosa pora hoise koi kene jani loise, tai nijorke koise, "Etiya moi hosa pora jani loise Probhu moike Herod laga hath pora bachai lobe nimite Tai laga sorgodoth ke pathai dise, aru Yehudi manu khan ki bhabona kori thakise etu pora moike ulaikene anise." <sup>12</sup> Jitia tai etu buji jaise, tai John, kunke Mark bhi mate tai laga ama Mary laga ghor te jaise, ta te bisi manu khan joma kori kene prathana kori thakise. <sup>13</sup> Aru jitia Peter dorjate marikena awaj dise, ekjon chukri noukar Rhoda koi kene dorja khuli bole ahise. <sup>14</sup> Jitia tai Peter laga awaj janise, khushi pora dorja khuli bole pahorise; aru tai, polaikene kamra te ahise; aru taikhan ke Peter dorjate khara kori kene ase koise. <sup>15</sup> Titia taikhan pora koise, "Tumi pagli hoise." Kintu tai Peter ahise koi kene jor pora koi dise. Titia taikhan koise, "Etu tai laga sorgodoth hobo." <sup>16</sup> Kintu Peter to dorjate mari thakise, aru jitia taikhan dorja khuli se, taikhan taike dikhi kene bisi asurit hoise. <sup>17</sup> Kintu tai taikhan ke hath pora chup thaki bole dikhai dise, aru kineka kori kene Probhu pora taike bondhi ghor pora ulai dise etu taikhan ke koise, "Jai kene etu kotha James aru bhai khan ke kobi." Aru ta te pora tai dusra jagate jai jaise. <sup>18</sup> Aru jitia din hoise, sipahi khan Peter logote ki hoise eku bhi jana nai. <sup>19</sup> Aru jitia Herod Peter ke bisari kene panai,

tai sipahi khan ke hudise aru taikhan ke morai dibole hukum dise. Etu pichete tai Judea pora jai kene Caesarea te thakise.

### *Herod Mora*

<sup>20</sup> Aru Herod to Tyre aru Sidon laga manu khan uporte bisi khong thakise. Etu karone taikhan joma hoi kene eke logote taike lok kori bole ahise. Taikhan Blastus koi kene Raja laga kaam kora ekjon ke kotha korise aru taikhan ke modot kori bole phuslai loise. Titia taikhan shanti thaki bole nimate mangise, kelemane taikhan laga desh te kha luwa kiman jai, sob etu raja laga desh pora he jai thakise. <sup>21</sup> Kotha kori kene rakha dinte, Herod raja laga kapra lagai kene tai nijorke taiyar korise. Tai laga singhason te bohi kene taikhan ke kotha korise. <sup>22</sup> Kintu manu khan hala kori koise, "Etu Isor laga awaj ase, manu laga nohoi!" <sup>23</sup> Titia etu homoi te Probhu laga sorgodoth joldi taike mari dise, kelemane tai Isor ke mohima diya nai; aru puka pora taike khai kene morai dise.

<sup>24</sup> Aru Isor laga kotha bisi-bisi hoi jaise.

<sup>25</sup> Aru jitia Barnabas aru Saul taikhan laga kaam pura kori loise, taikhan Jerusalem te jaise, aru John kunke Mark bhi mate taike bhi loi anise.

## 13

### *Barnabas Aru Saul Ke Pathai Diya*

<sup>1</sup> Aru Antioch girja te bhabobadi khan aru hikhok khan bhi thakise. Barnabas aru Simon - junke Niger koi-, aru Cyrene laga Lucius, - Herod tetrarch pora pala bhai- aru Saul. <sup>2</sup> Jitia taikhan Isor ke aradhana kori kene aru upwas kori

thakise, Pobitro Atma pora koise, “Tumikhan Barnabas aru Saul ke Ami nimite alag rakhi dibi, Moi taikhan nimite ki kaam ase etu kori bole karone.” <sup>3</sup> Titia taikhan upwas rakhise aru duijon uporte hath dikena prathana kori dise, aru tai duijon ke pathai dise.

### *Cyprus Te Barnabas Aru Saul*

<sup>4</sup> Barnabas aru Saul ke Pobitro Atma pora Seleucia te pathai dise; aru taikhan naw te uthi kene Cyprus majuli te jaise. <sup>5</sup> Aru jitia duijon Salamis sheher te ponchise, taikhan Yehudi khan laga mondoli te jai kene Isor laga kotha prochar korise. Aru duijon ke modot kori bole John Mark bhi thakise. <sup>6</sup> Aru jitia taikhan Paphos sheher laga sob jagate jaise, ta te ekjon jadu kora manu ke lok paise, Yehudi laga misa bhabobadi, tai laga naam Bar Jesus thakise. <sup>7</sup> Etu jadu kora manu to Proconsul Sergius Paulus logote thakise, tai gyaan thaka manu asele. Tai Barnabas aru Saul ke matise, kelemane tai Isor laga kotha huni bole mon thakise. <sup>8</sup> Kintu Elymas “Jadu kora manu” -taike eneka naam pora he mate- taikhan ke bhirodh korise; tai proconsul ke biswas pora hatai dibole kosis korise. <sup>9</sup> Titia Saul, junke Paul koi kene mate, taike Pobitro Atma pora bhorta hoise, aru taike bhal pora saise <sup>10</sup> aru koise, “Tumi saitana laga bacha, tumi sob biya kaam pora bhorta hoi ase aru tumi logote sob letera bhabona he ase. Tumi dharmikta laga sob kisim kaam laga dushman ase. Tumi Probhu laga sidha rasta to tera kori bole kitia bhi norokhibo, hoi na nohoi? <sup>11</sup> Etiya sabi, Probhu laga hath tumi

uporte ase, aru tumi suku andha hoi jabo. Tumi olop din nimite suryo to nadikhibo.” Etu homoi te Elymas uporte andhera ahi jaise, aru tai manu khan ke tai laga hath dhurikena loi jabile modot mangise. <sup>12</sup> Jitia proconsul pora ki hoise etu dikhise, tai biswas korise, kelemane tai Isor laga kotha sikhai diya to asurit lagise.

### *Pisidia Antioch Te Paul Aru Barnabas*

<sup>13</sup> Aru titia Paul aru tai laga sathi khan Paphos pora naw te uthi kene jaise aru Pamphylia jagate thaka Perga sheher te ahi jaise. Kintu John taikhan ke chari kene aru Jerusalem te wapasa ahi jaise. <sup>14</sup> Kintu Paul aru tai laga sathi khan Perga te jaise aru Antioch laga Pisidia jagate ponchise. Taikhan Bisram laga dinte mondoli te jai kene bohise. <sup>15</sup> Bhabobadi aru niyom laga kotha porha pichete, mondoli laga cholawta khan pora koise, “Bhai khan, yate laga manu khan nimite kiba bhal kotha ase koile, kobi.” <sup>16</sup> Titia Paul khara korise aru hath pora dikhai kene koise, “Israel manu aru Isor ke bhoi kori kene thaka khan, huni bhi. <sup>17</sup> Israel manu laga Isor pora moi khan baba laga baba khan ke basi loise aru bisi kori dise jitia taikhan Egypt te thakise, aru Tai laga hath to uthaikene taikhan ke tai pora ulai loi anise. <sup>18</sup> Aru chalis saal tak Tai jongol te taikhan logote thakise. <sup>19</sup> Aru jitia Tai Cannan laga sat-ta desh ke khotom kori dise, Tai etu jaga amikhan laga manu khan ke dise. <sup>20</sup> Etu sob charsoh pachas saal upor hoise. Etu sob huwa pichete, Isor taikhan ke bisar dise jitia tak bhabobadi Samuel aha nai. <sup>21</sup> Titia taikhan

raja mangise, aru Isor pora taikhan ke Kish laga chokra Saul dise, ekjon Benjamin laga jat pora, chalis saal tak raja hobole dise. <sup>22</sup> Kintu Isor pora Saul ke raja laga jaga pora hatai diya pichete, taikhan nimate David ke raja bonai dise. Aru David nimate bhi Isor pora koise, 'Moi laga mon usorte te thaka ekjon Jesse laga chokra David ke paise, tai moi laga itcha kaam sob koribo.' <sup>23</sup> Etu manu laga khandan pora Isor Israel te bachai diya, Jisu ke pathaise, Tai Israel manu khan ke kosom diya nisena. <sup>24</sup> Etu sob to shuru hoise jitia, Jisu naha age te, John poila Israel manu khan ke baptizma dikene mon ghura bole koise. <sup>25</sup> Aru jitia John laga kaam khotom kori thakise, tai hudise, 'Moike tumikhan kun ase bhabe? Moi etu nohoi. Kintu huni bhi, ekjon ahi ase, aru tai laga theng laga juta bandhi bole bhi moi layak nai.' <sup>26</sup> Hey bhai khan, Abraham khandan laga bacha khan, apuni khan majote kun Isor ke bhoi kore, amikhan nimate he etu notun jibon laga kotha to pathai dise. <sup>27</sup> Kunkhan Jerusalem te thaki ase, aru taikhan laga cholawta khan Taike chini bole para nai, aru bhabobadi khan kowa to pura kori dise, jun to ase, hodai Bisram dinte Taike hinsa aru bodnam kori kene puri thake. <sup>28</sup> Aru taikhan Taike morai dibole eku golti napai le bhi, taikhan Pilate ke Jisu morai dibole koise. <sup>29</sup> Jitia Tai nimate Shastro te ki likha ase etu sob pura hoise, taikhan Cross pora Taike namai ani kene kobor te rakhidise. <sup>30</sup> Kintu Isor Taike mora pora aru bhi jinda kori dise. <sup>31</sup> Aru Tai logote Galilee pora Jerusalem te kun manu khan ahise bisi din tak Taike dikhise. Aru etu manu

khan Tai laga gawahi manu khan ke koi kene berai. <sup>32</sup> Aru etu nimate amikhan etu kotha to koi kene prochar kore juntu Isor pora amikhan laga baba khan ke kosom disele. <sup>33</sup> Isor he sob kotha to amikhan nimate, taikhan laga bacha khan nimate pura kori dise, Jisu ke jinda kori diya pora. Bhajan Geet te likhi kene thaka nisena:

‘Tumi Moi laga chokra ase, aji pora Moi tumi laga Baba hoise.’

<sup>34</sup> Taike mora pora jinda kori diya motlob ase Tai laga gaw to kitia bhi napuchibo, Isor to eneka koise:

Moi tumike Pobitro aru hosa asirbad dibo juntu moi David ke kosom disele.’

<sup>35</sup> Etu nimate tai dusra Psalms te aru koi kene ase, ‘Apuni kitia bhi Pobitro ekjon ke puchibole nadibo.’

<sup>36</sup> Keleman David tai laga homoi te Isor laga itcha pora Tai nijor manu ke sewa kori thakise aru mori jaise, aru tai baba khan logot moidam te dise, aru puchi jaise. <sup>37</sup> Kintu Jisu junke Isor jinda kori dise, Taike puchibole diya nai. <sup>38</sup> Kintu apuni khan jani lobi, manu khan, bhai khan, etu manu pora he apuni khan paap to maph pabo, aru sob biya pora ajadi pabo jun to Moses laga niyom pora bhi apnikhan ke dibole para nai. <sup>39</sup> Aru jun Taike biswas kore tai bachi jabo. <sup>40</sup> Etu karone hoshiar thakibi bhabobadi khan pora ki koise etu apuni khan logote nohobole nimate:

<sup>41</sup> ‘Sabi, hinsa kora khan, asurit hoi kene nijor harai jabi;

Moi apuni khan laga homoi te kaam kori ase,

Etu kaam juntu tumikhan kitia bhi biswas nakore, jodi bhi kunba apuni khan ke ahikena koi dile bhi.' "

<sup>42</sup> Aru jitia Paul aru Barnabas jaise, manu khan taikhan ke anurodh korise etu kotha ahi kene aru Bisram dinte koi dibole. <sup>43</sup> Aru jitia mondoli laga sabha khotom hoise, Yehudi khan aru Yunani bhasa kotha koi thaka Yehudi khan Paul aru Barnabas pichete jaise, aru taikhan pora duijon ke Isor laga morom to koi thaki bole nimate koise,

<sup>44</sup> Aru Bisram laga dusra dinte, pura sheher eke logote joma hoise Probhu laga kotha huni bole nimate. <sup>45</sup> Kintu jitia Yehudi khan pora dangor bhiri dikhise, taikhan suku jolise aru Paul laga biya kotha koise aru taike sorom khilai dise.

<sup>46</sup> Kintu Paul aru Barnabas mon dangor kori kene koise, "Isor kotha apuni khan logote poila kobole bisi dorkar thakise. Kintu Isor kotha to hatai diya dikhi kene tumikhan Tai laga rajyote jabole layak nai, sabi, amikhan Porjati khan logot jai ase. <sup>47</sup> Etu karone Probhu he moike hukum dise, aru koise,

'Moi tumikhan ke biswas nathaka khan laga ekta puhor bonai dise,

Etu pora tumikhan prithibi laga sob kona te jai kene anonto jibon laga kotha to koi dibo.' "

<sup>48</sup> Jitia Porjati khan etu kotha hunise, taikhan khushi paise aru Probhu laga kotha ke dhanyavad dise. Aru jiman manu anonto jibon pabole ase etu khan biswas kori loise.

<sup>49</sup> Aru Probhu laga kotha sob usor-usor jagate prochar hoi jaise. <sup>50</sup> Kintu niyom luwa manu aru dorkar thaka maiki, aru sheher te manu majote

naam thaka khan ke Yehudi khan pora Paul aru Barnabas ke digdar dibole korise, aru duijon ke taikhan laga desh pora bahar ulai dise. <sup>51</sup> Kintu Paul aru Barnabas taikhan usor pora theng laga dhula sapha korise. Aru ta te pora Iconium laga sheher te jaise. <sup>52</sup> Aru chela khan Pobitro Atma pora bhorta hoi kene khushi pora thakise.

## 14

### *Paul Aru Barnabas Iconium Te*

<sup>1</sup> Etiya Iconium te eneka hoise, Paul aru Barnabas pora Yehudi khan laga mondoli te jaise aru kineka tai duijon kotha koise, etu huni kene bisi Yehudi aru Porjati manu khan biswas korise. <sup>2</sup> Kintu kotha namana Yehudi khan pora manu khan laga bhabona biya kotha pora bhorta kori kene nijor bhai khan laga dushman kori dise. <sup>3</sup> Kintu taikhan ta te olop din thakise, aru Isor laga kotha mon dangor pora koise, aru Isor he Paul aru Barnabas laga hath pora Tai laga asurit kaam manu khan ke dikhai dise. <sup>4</sup> Kintu sheher te thaka manu khan bhag hoi jaise; kunba Yehudi phale jaise, aru kunba apostle khan phale jaise. <sup>5</sup> Aru jitia biswas nakora khan aru Yehudi aru taikhan laga cholawta khan mili kene duijon ke hinsa kori kene pathor mari bole bisarise, <sup>6</sup> tai duijon etu jani loise aru ta te pora Lycaonia, Lystra aru Derbe aru etu usorte thaka sheher te polai jaise, <sup>7</sup> aru taikhan Isor laga kotha prochar kori thakise.

### *Lystra Te Paul Aru Barnabas*

<sup>8</sup> Aru Lystra town te ekjon lengra manu bohise, tai laga theng te khara hobole olop bhi takot thaka nai, tai ama laga pet pora he lengra jonon hoise, tai kitia bhi bera nai. <sup>9</sup> Etu manu Paul kotha kowa hunise, titia Paul etu manu ke bhal hoi jabole mon kori thaka laga biswas dikhi kene taikhe bhal pora sai thakise. <sup>10</sup> Aru titia tai untcha awaj pora koise, “Uthi kene tumi laga theng te khara hobi.” Titia etu manu uthi kene bera bole shuru hoise. <sup>11</sup> Jitia manu khan Paul ki korise etu dikhise, taikhan laga awaj uthaise aru Lycaonia laga bhasa te koise, “Isor khan manu laga gaw loi kene amikhan majote ahise.” <sup>12</sup> Aru taikhan Barnabas ke “Zeus,” matise, aru Paul ke “Hermes,” kelemene tai he kotha bisi koi thakise. <sup>13</sup> Titia Zeus mondoli laga purohit jun to sheher usorte thakise, bail guru aru phul laga mala loi kene dorja usorte ahise; tai aru ta te laga manu khan boli dibole mon jaise. <sup>14</sup> Kintu jitia apostle Barnabas aru Paul etu hunise, taikhan laga kapra phatai kene manu khan laga majote jai kene jor pora kandise. <sup>15</sup> Aru koise, “Manu khan, tumikhan kele eneka kori ase? Amikhan bhi apuni khan nisena bhabona thaka manu he ase. Amikhan apuni khan ke Isor laga kotha prochar kori bole ahise, etu kotha huni kene Isor pora itcha nakora kaam khan chari bole, sorgo, prithibi aru samundar te jiman jinis ase sob Tai pora he bonaise. <sup>16</sup> Poila homoi te, manu khan ke nijor khushi pora berabo disele. <sup>17</sup> Kintu, Tai manu khan ke chari diya nai, Tai sorgo pora pani dise aru phul ulaikene khabole nimate bhal mohina dise aru sob bhal kaam kori dise.” <sup>18</sup> Etu

kotha koi kene, Paul aru Barnabas taikhan ke boli dibole rukhaise.

### *Lystra Te Paul Ke Pathor Mara*

<sup>19</sup> Titia Antioch aru Iconium pora kunba Yehudi khan ta te ahise aru manu khan laga monte biya kotha hali dise. Aru titia Paul ke pathor mari kene sheher laga bahar te tani ulai dise, taikhan bhabise Paul mori jaise. <sup>20</sup> Kintu chela khan tai usorte khara kori thakise, titia tai uthi kene sheher te jaise. Aru dusra dinte, Barnabas logote Derbe te jaise. <sup>21</sup> Aru jitia tai duijon Isor laga kotha koi kene bisi chela bonaise, taikhan Lystra te jaise, aru Iconium aru ta te pora Antioch te jaise. <sup>22</sup> Aru taikhan chela khan ke biswas te hodai mon dangor hoi kene thaki bole sikhaise, aru koise, "Amikhan Isor laga rajyote jabole bisi dukh kori bole lagibo." <sup>23</sup> Aru sob girja te taikhan ke cholai loijabo nimate dangor manu basi dise, aru upwas rakhikena prathana korise, aru taikhan ke Isor hathte dise, junke taikhan biswas korise.

### *Paul Aru Barnabas Syria Laga Antioch Te Wapas Ahise*

<sup>24</sup> Aru etu pichete duijon Pisidia jaga paar kori kene Pamphylia te ahi jaise. <sup>25</sup> Jitia taikhan Perga te Isor kotha koi dise, ta te pora taikhan Attalia sheher te jaise. <sup>26</sup> Ta te pora duijon naw te uthi kene Antioch te jaise, ta te taikhan Isor laga anugrah kaam kori bole pathai sele, aru duijon etu kaam pura kori dise. <sup>27</sup> Jitia taikhan Antioch te ahise aru girja manu khan ke joma korise, Isor pora ki korise, aru kineka Porjati khan nimate

biswas laga dorja to khuli dise etu sob taikhan ke koi dise. <sup>28</sup> Aru duijon to chela khan logote bisi din tak ta te thakise.

## 15

### *Jerusalem Laga Sabha*

<sup>1</sup> Olop din pichete, kunba manu Judea jaga pora ahi kene Antioch te thaka bhai khan ke sikhai kene koise, "Jitia tak tumikhan Moses laga niyom te diya nisena sunnot nakore, tumikhan nabachibo." <sup>2</sup> Etu kotha kowa nimite Paul aru Barnabas logote manu khan mon mila nai aru taikhan uporte khong uthise. Paul aru Barnabas aru ta te kunba khan ke Jerusalem te jabole basi loise aru jai kene apostle aru bura manu khan ke taikhan ki koise etu hudibole nimite pathaise. <sup>3</sup> Titia taikhan ke girja pora pathaise, aru Phoenicia aru Samaria laga jaga khan pora juwa homoi te Porjati khan mon ghura laga kotha koidi thakise. Sob bhai khan etu khobor paikena bisi khushi korise. <sup>4</sup> Jitia taikhan Jerusalem te ponchise, taikhan ke girja laga apostle aru bura khan pora ahibole dise, aru Isor pora taikhan majot ki kori dise etu sob manu khan ke koi dise. <sup>5</sup> Kintu kunba biswas kora manu, kunkhan Pharisee khan logote mili kene thakise, khara kori kene koise, "Taikhan karone to sunnot kori bole dorkar ase aru Moses laga niyom mani kene thaki bole nimite sikhai dibole lage." <sup>6</sup> Titia apostle aru bura manu khan eke logote joma hoi kene etu kotha patise. <sup>7</sup> Jitia etu kotha bisi dangor hoi jaise, Peter khara kori kene taikhan ke koise,

“Bhai khan, Isor poila te apuni khan majote te moiike basi loise, moi laga mukh pora Porjati khan Isor laga kotha hunibo aru biswas koribo nimite. <sup>8</sup> Isor, Tai manu laga mon jane, aru sob gawahi diye, Pobitro Atma pora bhorta kori diye, jineka Tai moi khan uporte bhi korise; <sup>9</sup> aru Isor dwara Porjati khan aru amikhan majote eku alag bhabona nai, aru taikhan laga mon biswas pora sapha kori dise. <sup>10</sup> Etu nimite tumikhan kele Isor ke bisar kori ase, chela khan laga gola uporte amikhan aru amikhan laga baba khan pora kitia bhi uthable napara bhar to kele hali bole bisari ase? <sup>11</sup> Kintu amikhan biswas kore Probhu Jisu laga anugrah aru morom pora poritran pabo, kineka taikhan paise amikhan bhi pabo.”

<sup>12</sup> Aru ta te thaka sob manu khan chup hoi jaise jitia Paul aru Barnabas pora Porjati khan majote Isor pora ki asurit kaam kori dise etu taikhan ke koise. <sup>13</sup> Aru jitia taikhan kotha kori kene khotom hoise, James pora koise,

“Bhai khan, moi laga kotha huni bhi. <sup>14</sup> Simon pora poila koise kineka Isor pora Porjati khan ke modot kori dise aru taikhan majot pora Tai laga naam ulable nimite. <sup>15</sup> Aru bhabobadi khan etu kotha to manise, jineka etu Shastro te likha ase, <sup>16</sup> ‘Etu pichete moi aru bhi ahibo,

Aru moi David laga bhangi juwa tombu uporte ghor bonabo;

Aru biya hoija khan sob wapas bhal kori kene khara kori dibo,

<sup>17</sup> Kelemanee manu khan Isor ke bisaribo,

Aru sob Porjati khan moi laga naam matibo.

Etu Probhu pora koi ase, jun he etu sob kaam to kori dise. <sup>18</sup> Etu sob kaam shuru pora manu khan ke jonai dise.

<sup>19</sup> Etu karone, moi laga bhabona eneka ase, amikhan Porjati khan Isor phale aha to digdar nokorile lage. <sup>20</sup> Kintu taikhan ke likhi kene taikhan murti puja kora aru mangso laga itcha kaam kora, aru janwar laga gola kati kene khun kha etu sob nakoribole koi dibo. <sup>21</sup> Moses laga kotha sob sheher te ase, poila khandan pora loi kene, aru jun manu tai laga naam loi kene mondoli khan te prochar kore, aru tai laga naam hodai Bisram dinte loi thake.”

### *Porjati Biswasi Nimite Sabha Laga Chithi*

<sup>22</sup> Titia sob apostle khan, bura khan aru girja manu khan etu kotha khan bhal paise, aru basi luwa khan ke Paul aru Barnabas logote Antioch te pathai dibole taikhan sai loise. Titia Judas, kunke Barsabbas bhi mate, aru Silas taikhan biswasi bhai khan majote cholawta thakise, taike pathaise. <sup>23</sup> Aru taikhan hath pora chithi likhi dise: “Apostle aru bura khan pora, amikhan jun apuni khan laga bhai khan ase, jun khan Antioch, Syria, aru Cilicia te ase, aru Porjati khan ke salam di ase! <sup>24</sup> Amikhan hunise, kunba manu amikhan majot pora ulai jaise, aru amikhan ke eku huda nai, aru apuni khan ke ulta kotha sikhai kene Atma te dukh pabole dise. <sup>25</sup> Etu nimite, amikhan eke logote lok kori kene apnikhan ke pathabole bhal manu basi bo, jun khan logote amikhan bisi morom kora Barnabas aru Paul duijon bhi pathabole ase. <sup>26</sup> Etu manu

khan nijor laga jibon dikene Probhu Jisu Khrista laga naam nimite dukh uthai thake. <sup>27</sup> Etu karone Judas aru Silas ke pathai ase, taikhan bhi etu kotha khan nijor mukh pora apnikhan ke koi dibo. <sup>28</sup> Kelemanee Pobitro Atma pora amikhan nimite etu he bhal ase bhabise, apuni khan uporte eku kaam nathaka laga bhar pora dukh nadibo nimite: <sup>29</sup> murti puja ke boli diya pora apuni khan dur thakibo, aru khun para, aru gola kati kene morai diya pora, aru biya paap pora. Jodi apuni khan pora eitu khan sob pora dur thakise koile, apuni khan nijor nimite bhal ase. Bhal pora thakibi.”

<sup>30</sup> Jitia taikhan ke jabole dise, taikhan Antioch te ahi punchise; aru sob manu khan ke joma kora pichete, chithi taikhan ke dise. <sup>31</sup> Aru jitia girja pora etu porhise, taikhan bisi mon dangor kori diya kotha dikhi kene taikhan bisi khushi korise. <sup>32</sup> Judas aru Silas, duijon bhi bhabobadi thakise, aru ta te thaka bhai khan ke nijor kotha pora manu khan laga biswas aru mon dangor kori dise. <sup>33</sup> Aru olop din ta te thaki kene, taikhan ke kun bhai khan pora pathaise, taikhan logot wapas shanti pora pathai dise. <sup>34</sup> Kintu Silas, ta te aru thaki bole mon thakise. <sup>35</sup> Aru Paul aru Barnabas to Antioch te thaki jaise, Isor laga kotha manu khan ke sikhai thakise- dusra khan bhi duijon logote thakise.

### *Paul Aru Barnabas Alag Huwa*

<sup>36</sup> Olop din pichete, Paul pora Barnabas ke koise, “Ahibi amikhan poila jun sheher te jai kene Isor kotha prochar korise ta te laga bhai

khan ke jai kene lok koribo, aru taikhan kineka ase etu sabo.” <sup>37</sup> Barnabas taikhan logote John kunke Mark bhi mate taike loi jabole mon thakise. <sup>38</sup> Kintu Mark ke loi juwa to thik nohoi eneka Paul pora bhabise, ta te pora John to Pamphylia te jaise aru taikhan ki kaam nimate jaise etu kaam te tai aru age naja hoise. <sup>39</sup> Etu nimate tai duijon majot kotha mila nai, aru ta te pora tai duijon alag hoi jaise, aru Barnabas pora Mark ke loi kene naw pora Cyprus te jai jaise. <sup>40</sup> Kintu Paul pora Silas ke basi loise aru ta te bhai khan pora duijon ke Isor laga anugraha te rakhi kene sob kaam di dise. <sup>41</sup> Aru tai Syria aru Cilicia te jaise, aru girja khan te jaikena biswasi khan laga mon dangor kori dise.

## 16

### *Paul Aru Silas Logot Timothy*

<sup>1</sup> Etu pichete tai Derbe aru Lystra sheher te jaise; aru sabi, ta te ekjon chela Timothy koi kene thakise, tai ekjon biswasi aru Yehudi mahila laga chokra asele; kintu tai laga baba to Yunani manu thakise. <sup>2</sup> Lystra aru Iconium te thaka biswasi bhai khan tai laga bhal kotha he koise. <sup>3</sup> Paul pora Timothy ke loi jabole mon thakise; aru taike sunnot kori dise kelemane etu jagate Yehudi khan thakise, aru ta te laga manu khan sob jani thakise tai laga baba Yunani manu ase koi kene. <sup>4</sup> Aru Paul, Silas aru Timothy khan sheher te ja-a homoi te, taikhan girja khan te manu khan ke Isor kotha mani bole sikhaise, juntu kotha Jerusalem te thaka apostle aru girja

laga bura khan pora taikhan ke kobole faisla kori dise. <sup>5</sup> Etu pora girja khan biswas te takot hoi thakise, aru hodai din manu bhi bisi-bisi hoi jaise.

### *Macedonia Khan Pora Mata*

<sup>6</sup> Paul aru tai laga sathi khan Phrygia aru Galatia laga jaga phale pora jaise, kelemane Pobitro Atma pora taikhan ke Asia te prochar kori bole mana korise. <sup>7</sup> Jitia taikhan Mysia sheher usorte ahise, taikhan Bithynia te jabole kosis korise, kintu Jisu laga Atma pora ta te jabole mana korise. <sup>8</sup> Etu karone taikhan Mysia paar kori kene Troas sheher te jaise. <sup>9</sup> Etu rati te Paul ekta darshan dikhise: ekjon manu Macedonia jagate khara kori thakise, aru taike mati kene koise, "Ahi kene amikhan ke Macedonia te modot koribi." <sup>10</sup> Jitia Paul etu darshan dikhise, etu homoi te amikhan joldi Mecedonia te jaise, kelemane taikhan ke susamachar koi dibole Isor amikhan ke matise.

### *Lydia Mon Ghurai Luwa*

<sup>11</sup> Aru amikhan Troas pora naw te uthi kene sidha Somothrace laga majuli te jaise, aru dusra din Neapolis sheher te ahi jaise. <sup>12</sup> Aru ta te pora Mecedonia laga sob pora dangor sheher Philippi te punchise, Rome manu khan laga jaga, aru amikhan ta te olop din thakise. <sup>13</sup> Aru Bisram dinte amikhan sheher bahar te ulaikene nodi kinar phale, prathana kori bole jagah ase bhabi kene ta te jaise. Titia amikhan bohise aru ta te mahila khan joma hoi kene thaka khan logote kotha korise. <sup>14</sup> Ta te ekjon mahila Lydia koi

kene asele, Thyatira te tai begoni rong kapra bikiri kori thake, tai Isor ke mohima kore, aru tai amikhan laga kotha hunise. Probhu he etu mahila laga mon khuli kene Paul laga kotha bhal pora huni bole dise. <sup>15</sup> Aru jitia tai aru tai laga ghor manu sob baptizma loise, tai amikhan ke hudi kene koise, “Jodi apuni khan moi Isor usorte biswasi ase koi kene bisar kore, ahi kene moi laga ghor te thaki bhi.” Aru amikhan tai laga ghor te rukhibole jaise.

### *Paul Aru Silas Bondhi ghor Te*

<sup>16</sup> Etu homoi te, amikhan prathana kori bole ekta jagate jai thakise, titia amikhan ekjon jawan jyotishee kora mahila ke lok paise. Tai etu kaam kori kene tai laga malik khan ke bisi poisa kamaikena di thakise. <sup>17</sup> Etu mahila Paul aru amikhan laga pichete ahi kene hala korise, aru koise, “Etu manu khan sobse Mohan Isor laga noukar khan ase. Taikhan pora apnikhan logot prochar kora to poritran pabole rasta ase.” <sup>18</sup> Tai bisi din eneka koi thakise, kintu tai eneka kowa to Paul ke bhal panai, aru tai ghurai kene dusto atma ke koise, “Moi Jisu Khrista naam pora tumike hukum di ase tai pora ulai jabi,” aru etu homoi te atma ulai jaise.

<sup>19</sup> Kintu jitia tai laga malik khan poisa aha rasta to bondh hoija dikhise, taikhan Paul aru Silas ke dhori kene bajar laga adhikari khan usorte loi anise. <sup>20</sup> Aru jitia taikhan ke bisar kora manu khan usorte anise, taikhan koise, “Etu manu khan amikhan laga sheher ke biya kori ase. Taikhan Yehudi manu ase. <sup>21</sup> Moi khan ki niyom manibo napare etu sikhai ase

aru Rome laga niyom lobole koi ase.” <sup>22</sup> Titia manu khan Paul aru Silas uporte khong korise, aru bisar kora manu khan pora tai duijon laga kapra phatai kene pitabole hukum dise. <sup>23</sup> Aru tai duijon ke bisi marise, aru bondhi ghor te bondh kori dise aru bondhi ghor laga adhikari ke bhal pora duijon ke rukhibole hukum dise. <sup>24</sup> Jitia tai etu hukum paise, bondhi ghor laga adhikari pora tai duijon laga theng bandhi kene bondh kora bhitor kamra te rakhidise.

### *Bondhi Ghor Adhikari Mon Ghurai Luwa*

<sup>25</sup> Aru adha rati te Paul aru Silas prathana kori kene Isor laga gana gayi thakise, aru bondhi ghor te thaka dusra koidi khan taikhan ke huni thakise. <sup>26</sup> Achanak pora dangor mati hili se, aru bondhi ghor laga khamba khan hili jaise; aru etu homoi te dorja khan khuli jaise, aru manu khan ke bandhi rakha loha rusi sob khuli jaise. <sup>27</sup> Titia adhikari ghumai thaka pora uthijaise aru dorja khan sob khula dikhise; aru tai laga talwar ulaikene nijorke morai dibole korise, kelemane tai bhabise bondhi ghor te thaka manu khan sob polai jaise. <sup>28</sup> Kintu Paul jor pora hala kori kene koise, “Nijorke jokhom nadibi, kelemane amikhan sob yate ase.” <sup>29</sup> Titia bondhi ghor laga adhikari pora saaki mangi kene bhitor te polai ahise, aru bhoi pora kapi kene, Paul aru Silas laga theng te giri jaise, <sup>30</sup> aru tai duijon ke bahar te loi ani kene koise, “Sahab khan, poritran pabole moi ki koribo lage?” <sup>31</sup> Titia duijon Taike jawab dise, “Probhu Jisu ke biswas koribi, titia tumi aru tumi laga ghor manu sob

bachhi jabo.” <sup>32</sup> Titia duijon taikhe aru tai laga ghor manu sobke Probhu laga kotha hunai dise. <sup>33</sup> Titia bondhi ghor laga sipahi pora etu rati te duijon ke loi jaise, aru taikhan laga jokhom sapha kori dise, tai laga sob ghor manu aru tai etu homoi te baptizma loise. <sup>34</sup> Aru duijon ke tai laga ghor te loi anise aru kha luwa dise, aru tai Isor ke biswas korise koi kene tai laga sob ghor manu bisi khushi korise.

<sup>35</sup> Aru jitia din hoise, titia sahab khan pora sipahi khan ke pathaise aru koise, “Taikhan ke jabole dibi.” <sup>36</sup> Titia sahab pora jai kene etu kotha Paul ke koise, “Bisar kora manu pora moike apuni khan ke chari dibole koise. Etu nimate bahar te ulabi, aru shanti pora jabi.” <sup>37</sup> Kintu Paul taikhan ke koise, “Amikhan Rome laga manu ase, hoilebi bisar laga niyom nacholai kene ami duijon ke marise, aru bondhi ghor te hali dise. Etiya to moi khan ke lukai kene pathai dibole mon ase? Eneka nohoi! Kintu, taikhan nijor ahi kene amikhan ke bahar te loi jabole dibi.” <sup>38</sup> Titia sipahi khan bisar kora manu khan ke jai kene etu kotha koise, aru jitia Paul aru Silas Roman manu ase koi kene janise, taikhan bhoi lagi jaise. <sup>39</sup> Titia bisar kora manu khan ahi kene taikhan ke maph mangise, aru duijon ke bahar te ulaikene anise, aru sheher pora jai jabole koise. <sup>40</sup> Titia duijon bondhi ghor pora ulaikene Lydia laga ghor te jaise. Aru jitia Paul aru Silas duijon bhai khan ke dikhise, taikhan laga mon dangor koridi kene sheher pora jai jaise.

# 17

## *Thessalonica Te Paul Aru Silas*

<sup>1</sup> Ek din paul aru silas duijon Amphipolis aru Apollonia laga sheher paar kori kene jaise, aru Thessalonica laga sheher te ahi ponchise, ta te Yehudi khan laga ekta mondoli thakise. <sup>2</sup> Aru Paul laga adat ekta thaka nisina, tai taikhan logote jaise, aru tin Bisram din tak taikhan logote Isor laga kotha koi thakise. <sup>3</sup> Aru tai Shastro khuli kene taikhan ke bujhai thakise ki Khrista dukh pabo aru mora pora jinda hoi jabo, aru etu eneka hobole dorkar thakise. Aru tai koise, "Etu Jisu kun laga kotha koi kene moi prochar kori ase Tai he Khrista ase." <sup>4</sup> Ta te kunba Yehudi khan Paul aru Silas laga kotha huni kene tai duijon logote milai loise, aru taikhan logote kunba Yunani khan aru kunba maiki khan bhi mili jaise. <sup>5</sup> Kintu biswas nakora Yehudi khan mon julise, aru bajar pora biya manu ke joma kori loise, aru bisi manu lagai kene sheher te hala korise. Aru jitia Jason laga ghor bhangai dise, aru Paul aru Silas ke manu khan dhori kene loi anibole bisarise. <sup>6</sup> Kintu jitia taikhan duijon ke panai, taikhan Jason aru kunba biswasi bhai khan ke dhori kene sheher laga adhikari khan usorte loi jaise, aru hala kori kene koise, "Etu manu khan jun duniya ke ulta koridi ase, taikhan bhi yate ahikena ase. <sup>7</sup> Jason pora tai laga ghor te manu kunkhan rakhise kunkhan Caesar laga kotha mana nai, aru taikhan koi ase Jisu koi kene dusra raja ase." <sup>8</sup> Aru etu kotha huni kene bisi manu khan aru sheher laga adhikari khan sob chinta hoise. <sup>9</sup> Kintu taikhan Jason aru tai laga

saathi khan pora poisa loise, aru dusra biswasi khan ke jabole dise.

### *Berea Te Paul Aru Silas*

<sup>10</sup> Titia biswasi bhai khan etu raṭi te Paul aru Silas ke Berea sheher te pathai dise. Aru jitia duijon ta te ponchise, tai duijon Yehudi khan laga mondoli te jaise. <sup>11</sup> Aru Thessalonica te thaka manu khan to dusra jaga laga manu khan pora bhi bhal thakise, kelemane taikhan hodai din Isor laga kotha te ki likha ase etu saikene bhal mon pora grohon kori thakise. <sup>12</sup> Etu nimate bisi manu Jisu ke biswas kori loise, aru ta te laga Yunani niyom mani thaka mahila khan aru kunba mota manu khan bhi biswas korise. <sup>13</sup> Kintu jitia Thessalonica laga Yehudi khan Paul pora Berea te Isor laga kotha koi ase koi kene janise, taikhan jai kene manu khan laga monte biya kotha hali dise aru mon biya kori bole dise. <sup>14</sup> Etu homoi te, biswasi bhai khan joldi Paul ke samundar phale pora jabole dise, kintu Silas aru Timothy to Berea te thaki jaise. <sup>15</sup> Aru jun manu Paul ke loi jaise taikhan Athens sheher pora aru dur te taike loi jaise. Aru jitia taikhan Silas aru Timothy duijon ke Paul pora tai usorte te joldi ahibole dibi koi kene khobor paise, taikhan nijor laga ghor te jai jaise.

### *Paul Athens Te*

<sup>16</sup> Jitia Paul Athens te Silas aru Timothy ke rukhi thakise, tai etu sheher te murti bhorta thaka dikhi kene tai laga atma pora bisi mon dukh hoise. <sup>17</sup> Titia tai mondoli te jai kene Yehudi aru hosa Isor ke aradhana kora manu khan logote kotha korise, aru hodai tai jitia bajar

te jai ta te bhi manu lok paile etu laga kotha kori thakise. <sup>18</sup> Titia Epicurean aru Stoic khan laga pondit kunba ahi kene tai logot kotha lagi thakise, aru kunba koise, etu ke najana manu ki kobole mon kori ase? Dusra koise tai dusra jaga laga dhorom manu ase, kelemane tai Jisu laga kotha aru jee utha laga kotha prochar kori ase. <sup>19</sup> Taikhan Paul ke Aropagus laga usorte loi jaise aru koise, “Tumi ki koi ase aru sikhai ase etu amikhan bhi janibole paribo? <sup>20</sup> Kelemane amikhan laga kan pora kitia bhi nahuna kotha huni bole pai ase. Etu nimite, amikhan bhi janibole mon ase etu kotha laga ki motlob ase.” <sup>21</sup> -Etiya sob Athens laga manu aru dusra desh pora ahi kene thaka manu khan dusra eku kaam nakori kene kiba notun kotha hunile etu laga kotha koi kene bohi thake.

### *Paul Pora Sabha Manu Khan Majot Te Prochar Kora*

<sup>22</sup> Titia Paul Areopagus majote khara hoi kene koise,

“Tumi Athens laga manu khan, moi dikhi ase tumikhan sob kaam te bhal ase. <sup>23</sup> Jitia moi tumikhan laga puja kori thaka saman khan saikene paar kori thakise, tumikhan pathor pora bona bedi te eneka likhi kene rakha dikhise, “Ekjon najana Isor nimite.” Etu karone junke apnikhan najani kene puja kori thaki ase, etu laga kotha tumikhan ke moi kobo. <sup>24</sup> Isor jun he prithibi aru ta te thaka sob bonai dise, Tai sorgo aru prithibi laga Isor ase, manu pora bonai diya laga mondoli te nathake. <sup>25</sup> Aru Tai manu laga hath laga sewa nalage, aru manu pora eku

nibisare, kelemane Tai he sobke jibon aru saas diye aru manu ki lage Tai etu sob diye. <sup>26</sup> Aru Tai ekjon manu pora he ekta desh aru jiman manu etiya thaki ase etu sobke bonai dise, ki homoi te kineka dibole lage aru kun manu laga jat kote thaki bole lage etu sob Tai pora bonai kene rakhidise, <sup>27</sup> Eneka korile manu khan Taike bisaribo aru taikhan Isor phale mon dibo aru Tai usorte ahibo. Kintu Tai amikhan pora kitia bhi dur thaka nai. <sup>28</sup> Kelemane amikhan Tai logote jinda ase aru amikhan laga ki ase etu sob to Tai laga he ase, jineka apuni khan laga majote kitab likha ekjon pora koise,

‘Amikhan sob Tai laga bacha khan he ase.’

<sup>29</sup> Etu karone, amikhan Isor laga bacha ase, amikhan eneka bhabona kori bole nalage ki tai laga sobhab to suna, chandi, aru pathor nisena ase- eitu khan jinis to manu laga bhabona pora bonai. <sup>30</sup> Etu nimite Isor poila te manu laga paap dhyan nakori kene chari dise, kintu etiya Tai sob manu ke paap pora mon ghura bole hukum dise. <sup>31</sup> Kelemane, ek dinte rakhi kene ase, juntu dinte, Tai pora basi luwa ekjon pora etu duniya ke dhormikta pora bisar koribo. Isor he Jisu ke mora pora jinda kori kene Tai hosa Isor ase koi kene dikhai dise.”

<sup>32</sup> Aru jitia Athens laga manu khan mori kene jinda huwa kotha hunise, kunba ta te thaka khan Paul ke hinsa korise; kintu kunba koise, “Amikhan etu kotha apuni pora aru hunibo.”

<sup>33</sup> Etu pichete Paul taikhan laga majot pora ulai jaise. <sup>34</sup> Kintu kunba tai logote mili jaise aru tai ki kotha koise etu biswas korise, etu majote

Dionysius jun Areopagus laga ekjon manu, aru Damaris koi kene ekjon mahila, aru dusra manu khan bhi taikhan logote thakise.

## 18

### *Paul Corinth Te*

<sup>1</sup> Etu pichete Paul Athens pora Corinth sheher te jaise. <sup>2</sup> Ta te tai ekjon Yehudi manu Aquila koi kene lok paise, tai Pontus laga manu thakise, aru tai olop din age te Italy pora tai laga maiki Priscilla ke loi kene ahise, kelemane Claudius pora Yehudi manu khan ke Rome pora jai jable hukum dise. Paul taikhan usorte jaise, <sup>3</sup> aru kelemane taikhan ki kaam kore etu Paul bhi kora nimite, taikhan logote thaki kene kaam korise, kele koile taikhan sob tambu bona manu asele. <sup>4</sup> Aru Paul to mondoli te jai kene hodai Bisram dinte taikhan logote kotha kori thakise. Tai Yehudi aru Yunani manu khan ke Isor laga kotha mani kene thaki bole nimite koi thakise. <sup>5</sup> Jitia Silas aru Timothy duijon Macedonia pora ahise, Paul Isor laga kotha te pura mon dikene thakise, aru Yehudi manu khan ke Jisu Khrista laga gawahi koi thakise. <sup>6</sup> Kintu Yehudi manu khan tai laga kotha mana nai aru taike sorom khilai dise, Paul tai laga kapra jharikena taikhan ke koise, “Tumikhan laga khun tumikhan nijor matha uporte ahibole dibi; moi eku golti kora nai. Etiya pora moi Isor najana manu usorte he jabo.” <sup>7</sup> Aru tai ta te pora ulaikene ekjon manu Titus Justus laga ghor te jaise, tai Isor ke mohima kora ekjon thakise. Tai laga ghor mondoli laga usorte thakise. <sup>8</sup> Crispus, mondoli

laga ekjon cholawta, Probhu ke biswas kori loise, aru tai laga ghor manu sob bhi biswas korise; aru Corinth te kiman manu Isor laga kotha hunise taikhan bhi biswas kori kene baptizma loise.

<sup>9</sup> Aru ek rati, Probhu he Paul ke sapna te koise, “Bhoi na koribi, kintu moi laga kotha koi thakibi aru kitia bhi chup nathakibi. <sup>10</sup> Kelemané moi tumi logote ase, aru kun bhi tumike ahi kene eku kori bole na paribo, aru tumike nuksan nakoribo, kelemané etu sheher te moi laga manu bisi ase.”

<sup>11</sup> Aru Paul ta te ek saal aru choi mohina thakise, Isor laga kotha manu khan ke sikhai thakise.

<sup>12</sup> Kintu jitia Gallio pora Achaia laga Governor hoise, sob Yehudi manu khan mili kene Paul laga bhirodh te khara hoise aru taike dhori kene bisar kora jagate loi anise; <sup>13</sup> taikhan koise, “Etu manu amikhan laga niyom bhirodh te jai kene Isor laga kotha sikhai ase aru mani bole koi ase.” <sup>14</sup> Aru jitia Paul pora kotha kobole mukh khuli se, Gallio pora Yehudi khan ke koise, “Tumi Yehudi khan, jodi etu kotha golti aru paap kaam kora laga ase koile, moi tumikhan nimate bisar koribo. <sup>15</sup> Kintu tai koi thaka kotha kunba laga naam nimate aru tumikhan laga niyom laga ase koile, tumikhan nijor hai sai lobi. Moi etu kotha khan nimate bisar kori bole mon nai.” <sup>16</sup> Titia Gallio bisar laga jaga pora taikhan ke jabole dise. <sup>17</sup> Aru taikhan sob Sosthenes usorte jaise, mondoli laga ekjon cholawta, aru taike bisar kora jagate jai kene marise. Kintu Gallio to eitu khan nimate eku chinta kora nai.

*Paul Antioch Te Wapas Aha*

18 Aru Paul, bisi din ta te thaka pichete, ta te laga bhai khan ke chari kene Syria te jaise, Priscilla aru Aquila bhi tai logote thakise. Tai Cenchrea te tai nijor laga chuli kati dise kelemane tai kosom khaise. 19 Aru jitia taikhan Ephesus te ahise, Paul pora Priscilla aru Aquila ke ta te chari dise, kintu tai nijor jai kene Yehudi khan logote kotha kori thakise. 20 Jitia taikhan Paul ke ta te aru olop din thaki bole koise, tai mana nai. 21 Kintu tai anurodh kori kene taikhan ke koise, "Isor itcha hoile moi aru bhi ahibo." Ta te pora tai naw te uthi kene Ephesus te jai jaise.

22 Aru jitia Paul Caesarea te namise, tai jai kene Jerusalem girja te manu khan ke salam dise aru ta te pora tai Antioch te jaise. 23 Aru olop din ta te thaka pichete, Paul ta te pora ulai jai kene Galatia aru Phrygia laga desh te kiman biswasi manu khan ase taikhan laga mon dangor kori dise.

### *Ephesus Te Apollos Pora Himot Korikena Kotha Kowa*

24 Ta te Apollos koi kene ekjon manu thakise, tai jonom pora Alexandria laga manu thakise, kintu tai Ephesus te ahise. Tai to Isor laga kotha bhal pora jana aru kobo para ekjon gyaani manu thakise. 25 Apollos ke Probhu laga rasta te thik pora mani kene thaki bole koi dise. Atma te bhal kori kene thaki bole nimite, aru mon dikene Jisu laga kotha manu khan ke sikhai thake, kintu tai John pora diya baptizma he jane. 26 Etu nimite Apollos mondoli te jai kene mon dangor pora kotha koi thakise. Kintu jitia Priscilla aru Aquila tai laga kotha hunise, taikhe kinar te loijai kene

Isor laga kotha aru bhi bhal pora bujhai dise. <sup>27</sup> Jitia tai Achaia jaga ke paar kori kene jabole itcha korise, titia biswasi bhai khan pora tai laga mon dangor kori dise aru taike bhal pora grohon koribi koi kene Achaia te thaka chela khan ke ekta chithi likhi dise. Jitia tai ta te punchise, tai Isor laga anugrah pora biswasi khan ke bisi modot dise. <sup>28</sup> Aru Apollos pora manu khan usorte mon dangor kori kene Yehudi khan ke kotha pora jitise aru Shastro te likhi kene thaka pora Jisu he Khrista ase koi kene dikhai dise.

## 19

### *Ephesus Te Paul*

<sup>1</sup> Aru jitia Apollos Corinth te thakise, Paul to upor phale thaka desh paar kori kene Ephesus laga sheher te punchise, aru ta te kunba chela khan ke lok paise. <sup>2</sup> Aru Paul taikhan ke koise, “Tumikhan biswas kora homoi te Pobitro Atma paise?” Kintu taikhan taike koise, “Nai, amikhan Pobitro Atma ase koi kene huna bhi nai.” <sup>3</sup> Titia Paul koise, “Tenehoile tumikhan ki pora baptizma loise?” Taikhan koise, “John laga baptizma pora.” <sup>4</sup> Titia Paul koise, “John pora mon ghura laga baptizma pora tumikhan ke baptizma dise. Tai manu khan ke koise tumikhan John laga pichete ekjon ahi ase Taike biswas koribi, Tai Jisu ase.” <sup>5</sup> Jitia manu khan etu kotha hunise, taikhan sob Probhu Jisu laga naam te baptizma loise. <sup>6</sup> Aru jitia Paul taikhan laga uporte hath rakhidise, Pobitro Atma taikhan laga uporte ahi jaise titia taikhan alag kotha pora

bhabobani kobole shuru hoise. <sup>7</sup> Ta te taikhan sob milai kene baroh jon manu thakise.

<sup>8</sup> Aru Paul mondoli te jai kene tin mohina tak Isor laga kotha mon dangor kori kene koise, manu khan ke Isor laga rajyo kotha bhujai kene biswas kori bole koi dise. <sup>9</sup> Kintu kunba Yehudi khan mon tan kori kene kotha mana nai, taikhan manu khan usorte biya kotha kobole shuru hoise. Titia Paul taikhan ke chari kene chela khan ke loi jaise, aru hodai din Tyrannus hall te jai kene kotha koi thakise, <sup>10</sup> Aru eneka dui saal tak hoi thakise, etu karone Asia te kiman manu thakise taikhan sob Probhu laga kotha hunise, Yehudi aru Yunani manu khan bhi.

### *Sceva Laga Putro Khan*

<sup>11</sup> Isor pora Paul laga hath pora kitia bhi nadikha asurit kaam khan korise, <sup>12</sup> etu karone manu khan rumal nohoile kapra loi kene tai gaw ke chui dibo, aru bemar bhal hoi thake, aru biya atma khan bhi gaw chari kene bahar ulai jai thakise. <sup>13</sup> Titia kunba Yehudi khan etu jaga phale beraikena jadu-tona, jhara-jhari kori thakise. Taikhan bhi jun manu logot dushto atma thakise utu khan ke Probhu Jisu laga naam lobole kosis kori kene eneka koise, “Moi tumike Paul pora prochar kori thaka Jisu laga naam pora bahar te ulai jabole hukum di ase.” <sup>14</sup> Aru Yehudi laga maha purohit kaam kora Sceva laga sat jon chokra khan tineka kaam kori thakise. <sup>15</sup> Aru dushto atma koise, “Moi Jisu ke jane aru Paul ke bhi jane, kintu tumi kun ase?” <sup>16</sup> Titia jun logot te dusto atma thakise, utu manu taikhan uporte uthi kene taikhan ke marise aru harai

dise, aru manu khan sob utu ghor pora lengta hoi kene, bisi jokhom paikena polai jaise. <sup>17</sup> Aru utu kotha Ephesus te thaka Yehudi aru Yunani khan sob jani jaise, aru taikhan sob bhoi lagi jaise, aru Probhu Jisu naam ke prosansa kori thakise. <sup>18</sup> Aru jun biswas kori loise utu khan pora bisi manu ahi kene nijor-nijor he taikhan ki biya kaam korise etu sob laga paap shikar korise. <sup>19</sup> Aru jadu-tona kori thaka khan nijor-nijor jadu laga kitab khan joma kori sob manu pora dikhikena jolai dise, aru jitia utu daam hisab kori saise, etu chandi poisa te pachas hajar toka nisena thakise. <sup>20</sup> Karone Probhu laga kotha pora jiti kene biswasi khan bisi hoi jaise.

### *Ephesus Te Gondugol Huwa*

<sup>21</sup> Aru jitia Paul Ephesus te tai laga sewkai kaam khotom korise, tai Atma te bhabi loise jitia tai Jerusalem te jabo, titia tai Macedonia aru Achaia te bhi jabo; aru koise, “Ami ta te juwa pichete, aru Rome te bhi jai kene sabo lagibo.”

<sup>22</sup> Etu karone tai sewa te thaka Timothy aru Erastus duijon ke Macedonia te pathai kene tai olop homoi karone Asia te thaki jaise.

<sup>23</sup> Aru etu homoi te, Ephesus te Isor laga Rasta laga kotha nimite dangor gondugol hoise.

<sup>24</sup> Demetrius koi kene chandi laga kaam kora ekjon thakise aru tai chandi pora Artemis laga mondoli te murtikhan bisi bonaise, aru etu pora kaam kora khan bisi labh hoi thakise. <sup>25</sup> Aru tai pora tai nisena kaam kori thaka khan sobke mati anikena koise, “Hey sahab khan, apnikhan bhi jani ase, amikhan etu kaam kora pora bisi poisa

pai thake. <sup>26</sup> Aru apnikhan bhi dikhi aru huni ase, khali Ephesus te he nohoi kintu pura Asia te eneka koi kene Paul pora bisi manu ke biswas kori loi ase, tai koi ase juntu hath pora bonaise utu Isor nohoi. <sup>27</sup> Etu karone khali ami laga kaam ke he nohoi, kintu Asia te, aru pura duniya te puja kori thaka maha devi Artemis laga mondoli ke bhi bodnam koridi ase, aru devi laga naam bhi harai jabole bhoi hoise.” <sup>28</sup> Jitia manu khan etu kotha hunise, taikhan bisi khong uthise, aru bisi jor pora hala kori koise, “Ephesus laga Artemis mohan ase.” <sup>29</sup> Eneka hoi kene pura sheher te hala hoi jaise; titia taikhan mili kene ahise aru Gaius aru Aristarchus jun Paul logote safar kori thaka manu khan asele, tai duijon ke dhori kene moncho ghor te loi anise. <sup>30</sup> Aru Paul to ta te jabole bisi mon korise, kintu chela khan pora taikhe jabo diya nai. <sup>31</sup> Titia kunba Asia te thaka adhikari khan pora taikhan laga sathi khan ke khobor pathai kene Paul ke moncho ghor te najabi koise. <sup>32</sup> Aru bhir te thaka kunba pora kiba kobo, aru dusra pora kiba kobo eneka hoi thakise, etu pora bhir te manu khan bisi matha ghurai thakise. Ta te bisi manu etu bhi jani kene thaka nai taikhan kele ta te joma thakise. <sup>33</sup> Aru Yehudi khan pora Alexander ke age te loi rakhidise, aru Alexander tai laga hath uthaikene manu khan ke bujhai dibole korise. <sup>34</sup> Kintu jitia tai Yehudi manu ase koi kene jani loise, sob mili kene dui ghanta tak, “Ephesus laga Artemis mohan ase” eneka hala kori thakise. <sup>35</sup> Aru titia sheher laga cholawta he sob manu ke chup kori kene koise, “Hey Ephesus manu khan, Ephesus

laga sheher to maha devi laga mondoli rakhi thaka jaga ase koi kene, aru murti nisena sabole juntu akas pora ahise etu kun manu najane? <sup>36</sup> Karone utu jinis khan to nohoi kobo napare, titia hoile chup-chap hoi jabole lage, aru eku kori bole dorkar nai. <sup>37</sup> Kelemanee etu duijon mondoli te chor dokaiti kora nohoi aru tumi laga devi laga uporte eku biya kotha kowa nohoi, hoilebi tumikhan pora taikhan ke dhori anise. <sup>38</sup> Karone Demetrius aru tai logote kaam kora khan he kunba logot kotha namila thakile, bisar kora jaga aru sabha to khula ase, taikhan ta te pora bisar koribo dibi. <sup>39</sup> Kintu jodi apnikhan etu te bhi aru kiba ase koile, thik homoi te sabha pora bisar kori lobo lage. <sup>40</sup> Kelemanee aji gondugol kora nimite ami upor golti dibole bhoi ase, etu eku motlob nathaki kene gondugol kora etu laga jowab dibole na paribo.” <sup>41</sup> Aru tai etu kotha koi kene sabha ke chari dise.

## 20

### *Macedonia Aru Greece Te Paul*

<sup>1</sup> Jitia gondugol to khotom hoise, Paul chela khan ke mati anise aru taikhan ke samjai dise, aru taikhan ke bhidai kori kene tai Macedonia te jai jaise. <sup>2</sup> Titia tai utu desh khan paar kori kene khotom huwa pichete, tai Greece te ahi jaise. <sup>3</sup> Aru tai ta te tin mohina thakise aru ta te pora Syria te jabole thakise, kintu Yehudi khan taike morai dibole thaka jani kene, Macedonia phale pora he wapas jabole bhabi loise. <sup>4</sup> Aru Berea manu Sopater laga chokra, aru Thessalonica pora Aristarchus aru Secundus aru Derbe pora

Gaius aru Timothy aru Asia pora Tychicus aru Trophimus taikhan tai logote jaise. <sup>5</sup> Kintu eitu khan amikhan age te jai kene Troas te rukhi thakise. <sup>6</sup> Aru khomir nahala roti laga utsov din pichete amikhan Philippi pora naw te uthi kene pans din pichete Troas te taikhan logot ponchise, aru saat din tak ta te thakise.

### *Eutyclus Ke Mora Pora Jinda Uthai Diya*

<sup>7</sup> Titia hapta laga prothom din jitia biswasi chela khan eke loge loge mili kene roti bhangai sele. Paul dusra dinte jabole thakise, etu karone tai taikhan logot adha rati tak kotha kori thakise. <sup>8</sup> Upor kamra kot te amikhan joma thakisele ta te bisi saaki khan jolai rakhise. <sup>9</sup> Aru Eutyclus koi kene jawan ekjon khirki te bohi thakise, aru Paul bisi deri kotha koi thaka pora, tai ghumai kene tin tola upor pora nichete girikena morise. <sup>10</sup> Kintu Paul niche jai kene tai usorte tai laga gaw ke lamba korise, aru taike dhurise. Aru tai koise, “Bhoi nokoribi, kelemane tai laga jibon etiya bhi tai logot he ase.” <sup>11</sup> Titia tai aru upor jai kene roti bhangai khaise aru phojur tak kotha kori thakise, aru etu pichete jai jaise. <sup>12</sup> Aru taikhan utu chokra jinda pa karone ekdom shanti paise.

<sup>13</sup> Titia amikhan naw pora Assos te jaise, aru ta te pora naw te Paul ke uthabole thakise, kelemane tai nije pora he tai berai kene jabo koise, aru tai he eneka kori bole amikhan ke koise. <sup>14</sup> Aru tai Assos te ahi amikhan ke lok paise, aru amikhan taike uthaikene Mitylene te ahi jaise. <sup>15</sup> Aru ta te pora naw te uthi kene dusra din Chios usorte ahi jaise, utu din amikhan

Samos ponchise, aru Tragyllium te thaki kene dusra din Miletus te ahi Jaise. <sup>16</sup> Keleman Paul Asia te homoi phelabo mon kora nai, tai naw pora Ephesus paar kori bole mon korise, keleman parile Pentecost din tai Jerusalem te thakibo mon kori kene tara-tari kori thakisele.

*Ephesus Laga Bura Khan Logot Paul Pora Kotha Kowa*

<sup>17</sup> Tai Miletus pora khobor pathai kene Ephesus girja laga bura khan ke matise. <sup>18</sup> Aru jitia taikhan tai logot ahise, tai koise,

“Moi juntu din pora Asia te ahise, utu prothom din pora kineka moi tumi logote thakise, apnikhan jani ase.” <sup>19</sup> Moi nomrota korise aru suku pani girikena aru Yehudi khan pora chalak kori kene moike dukh di thakile bhi moi Probhu laga sewa kori thakise. <sup>20</sup> Aru moi apnikhan ke sikha khan te, manu usorte nohoile ghor te hoilebi tumi bhal nimite kaam nakori kene chari diya nai. <sup>21</sup> Yehudi aru Yehudi hobi, moi taikhan ke mon ghurai kene Isor phale ahibole aru Jisu ke biswas kori bole sikhai ahise. <sup>22</sup> Aru sabi, etiya moi Atma laga kotha mani kene Jerusalem te jai ase hoilebi ta te moi logote ki hobo moi najane. <sup>23</sup> Juntu sheher te jaile bhi Pobitro Atma pora ami laga gawah koridi thakise, aru khali bandha aru dukh he moike rukhi ase koi kene. <sup>24</sup> Kintu moi nijor jibon karone eku chinta nathaki, kintu Probhu Jisu pora ji kaam moike kori bole dise, utu Isor anugrah laga susamachar ke khushi pora manu ke jonai dibole aru etu pura kori bole he bhabi thake. <sup>25</sup> Aru sabi, moi jani ase, moi Isor rajyo kotha loi kene sob

jagate prochar koribo, aru apnikhan etiya pora ami laga chehera aru nadikhibo. <sup>26</sup> Etu moi aji apnikhan ke sakhi di ase, moi ekjon golti nathaka manu laga khun phale hoile golti nai. <sup>27</sup> Kelemanee Isor laga itcha phale sob kotha moi apuni khan ke koi diya hoise. <sup>28</sup> Etu karone apnikhan nije bhi hoshiar thakibi aru Pobitro Atma pora apnikhan ke sabole mer khan dise. Hoshiar pora Isor laga girja ke roikhya koribi, juntu Isor Tai Nijor laga bacha khun pora kinise. <sup>29</sup> Kelemanee moi jani ase moi juwa pichete rong kutta khan tumi laga majote ahibo, aru tumikhan ke nacharibo jun khan etiya bisi ase. <sup>30</sup> Aru moi jani ase tumikhan nijor bhitor pora bhi misa kowa ulabo aru biswasi khan ke taikhan phale kori loi lobo. <sup>31</sup> Karone hoshiar koi kene thakibi, aru bhabona koribi, moi tin saal tak rati din suku pani girai kene sob manu ke sikhaise. <sup>32</sup> Aru bhai khan moi etiya apnikhan ke di ase, Isor aru tai anugrah laga kotha juntu pora tumikhan ke uthidibo pare aru sapha kori diya khan logote milaikena tai laga miras pabo thaka khan ase. <sup>33</sup> Moi kun laga suna, chandi, kapra khan lalos kora nohoi. <sup>34</sup> Apnikhan jani ase, moi nijor hath pora sewa kori kene nijor aru jun moi logot thakise, taikhan ke ki lage sob kori ahise. <sup>35</sup> Moi apnikhan ke sob rasta sikhai dise, kineka sewa kori kene dukhia khan ke modot koribo lage, aru Probhu Jisu kotha monte bhabona kori bole, juntu Tai nijor pora koise: "Lu-a pora to diya jon he bisi asishit ase."

<sup>36</sup> Aru jitia tai etu kotha koi diya hoise, tai athukari kene taikhan logote prathana kori loise.

<sup>37</sup> Titia taikhan sob bisi kandise, aru Paul ke dhori kene taike chuma dise. <sup>38</sup> Taikhan bisi mon dukh huwa to Paul laga kotha karone hoise, aru kitia bhi tai laga chehera nadikhibo kowa karone, aru taikhan taike loijai kene jahaaj tak punchai dise.

## 21

### *Paul Jerusalem Te Juwa*

<sup>1</sup> Aru taikhan pora alag koi kene amikhan jahaaj te uthi kene sidha rasta jaise aru Cos te ponchise, aru dusra din Rhodes te, aru ta te pora Patara te ahi jaise. <sup>2</sup> Ta te pora ekta jahaaj Phoenicia te jabole thaka paise, etu pora amikhan bhi ta te uthi kene jaise. <sup>3</sup> Cyprus sheher ke dikhikena aru paar korise aru amikhan Syria phale jaise, aru Tyre te nami jaise, keleman ta te jahaaj laga saman namabole thakise. <sup>4</sup> Aru ta te kunba biswasi chela khan lok paikene amikhan saat din ta te thakise. Aru taikhan Atma dwara Paul ke Jerusalem te najabole koise. <sup>5</sup> Jitia amikhan laga din pura hoi jaise titia taikhan pora alag hoi kene amikhan logote taikhan maiki khan aru bacha khan sob loi kene amikhan ke sheher bahar te loijai dise, amikhan sob ta te pora athukari kene prathana korise, <sup>6</sup> titia alag hoi kene amikhan jahaaj te uthijaise, aru taikhan nijor-nijor ghor te jai jaise.

<sup>7</sup> Aru jitia amikhan Tyre pora safar khotom hoise, amikhan Ptolemais te ponchise. Aru bhai khan ke salam jonai kene taikhan logote ek din thakise. <sup>8</sup> Dusra din amikhan ta te pora ahi Caesarea te ponchise, aru prochar kora Phillip

jun saat jon laga majote ekjon asele, tai ghor te ahi kene tai logot thakise. <sup>9</sup> Etu manu laga shadi nakorikena thaka charjon swali thakise, aru utu khan sob bhabobani koi thakise. <sup>10</sup> Aru ta te bisi din thaki jaise, titia bhabobadi ekjon Agabus koi kene Judea pora ahise. <sup>11</sup> Jitia tai amikhan logot ahise tai Paul laga peti loi nijor hath theng ke bandi kene koise, “Jun manu etu komor bandha peti laga malik ase taike ‘Jerusalem te Yehudi khan pora taike eneka bandi kene Isor najana laga hathte dibo, eneka Pobitro Atma koi ase.’ ” <sup>12</sup> Etu kotha huni kene amikhan aru ta te thaka khan sob pora Paul ke Jerusalem te najabi koi kene rukhaise. <sup>13</sup> Kintu Paul koise, “Apuni khan ki kori ase, kandi-kandi kene ami laga mon dukhai ase? Moi to taiyar ase, khali bandibole nimite nohoi, hoilebi Probhu Jisu naam karone mori bole bhi taiyar ase.” <sup>14</sup> Jitia amikhan janise Paul to namanibo, titia amikhan chup thaki jaise aru titia moi khan koise, “Amikhan Isor laga itcha hobo dibi.”

<sup>15</sup> Aru utu din pichete amikhan saman bandhi kene Jerusalem te jai jaise. <sup>16</sup> Caesarea te kunba chela khan amikhan logote ahise, aru taikhan Mnason koi kene Cyprus manu ekjon jun purana chela asele, taike amikhan logote thaki bole loi anise.

### *Paul Pora James ke Lok Kora*

<sup>17</sup> Aru jitia amikhan Jerusalem te ponchise, biswasi bhai khan bisi khushi pora amikhan ke swekar korise. <sup>18</sup> Aru dusra dinte Paul amikhan ke James laga ghor te loi jaise, ta te girja bura khan sob joma thakise. <sup>19</sup> Titia tai taikhan ke

salam jonai kene Isor pora tai laga sewkai dwara ki kaam Porjati khan logote korise, eitu khan sob ekta-ekta kori kene sob koi dise. <sup>20</sup> Taikhan etu huni kene Isor ke mohima korise, aru tai koise, “Bhai khan etu sabi, Yehudi khan majote hajar manu bhi biswas kori loise, aru taikhan sob bhal pora niyom mani thake. <sup>21</sup> Taikhan ke manu khan pora apuni laga kotha koi dise, apuni Porjati khan laga jagah te thaka Yehudi khan ke Moses laga niyom ke namanibi koi kene hikai ase, aru bacha khan laga sunnot nakorile bhi hobo eneka sikhai ase hunise. <sup>22</sup> Tinehoile amikhan ki koribo? Taikhan apuni yate ahi ponchise koi kene jani thakibo pare. <sup>23</sup> Karone ekta kaam koribi amikhan logote kiba kori bole kosom luwa charjon ase. <sup>24</sup> Taikhan ke loi kene taikhan logote nijorke bhi pobitro kori lobi, aru taikhan matha chuli pura kati bole kharcha dibi. Titia sob manu jani lobo taikhan pora tumikhan laga ki kotha koi ase etu sob misa ase, kintu tumikhan to thik pora thaki ase aru niyom manikena thaki ase koi kene jani lobo. <sup>25</sup> Kintu Porjati khan ke jun biswas kori loise utu khan ke amikhan age pora likhi dise, murti ke boli diya laga bostu aru khun, aru gola mussri kene mangso kha-a aru bebichar kora, etu sob pora bachi thakibi koise.” <sup>26</sup> Titia Paul dusra din manu khan ke loi taikhan logote sapha kori loise, aru girja te jai kene ekjon-ekjon laga kiman din tak sapha koribo lage koi dise aru sob nimite daan korise.

*Mondoli Te Paul Ke Dhori Loise*

<sup>27</sup> Kintu jitia saat-din khotom hobole hoise, kunba Yehudi khan Asia pora ahikena taike mondoli te dikhise, aru manu khan ke chukli mari kene taike dhori loise. <sup>28</sup> Taikhan hala kori kene koise, "Hey Israel khan, amikhan ke modot dibi, etu manu pora sob jagah te manu khan ke manu khan, niyom khan aru etu jaga laga bhirodh kotha koi ase aru sikhai ase, aru tai Yunani manu khan ke bhi girja te anikena pobitro jaga ke letera kori dise." <sup>29</sup> Age te Paul ekbar Trophimus koi kene Ephesus laga manu logote berai thaka dikhise, aru taikhan bhabise Paul he eitu ke loi girja te anise eneka bhabi thakise. <sup>30</sup> Titia etu sheher te gondugol hoise, sob polai ahi kene Paul ke dhuri loise, aru taike tani bahar te loi jaise, aru joldi mondoli laga dorja khan bondh kori dise. <sup>31</sup> Aru taikhan taike morai dibole thaka homoi te, pura Jerusalem te hungama hoi ase koi kene etu khobor mukhyo henedhikari logote ponchise. <sup>32</sup> Titia tai joldi sipahi khan aru henapoti khan loi kene niche phale polaikena taikhan logot punchise, aru jitia manu khan mukhyo henedhikari aru sipahi khan ke dikhise, taikhan Paul ke mari thaka pora rukhi jaise. <sup>33</sup> Titia mukhyo henedhikari usorte ahi kene taike dhori loise, aru duita luha rusi pora taike bandi lobole koi dise, aru hudise etu manu kun ase aru tai ki korise. <sup>34</sup> Aru bhir te kunba kiba-kibi koise, aru kunba dusra kiba koi thakise, aru bisi hala kora karone tai thik pora eku bujhi bo para nai, etu karone taike bondhi kora jagate loi jabole hukum dise. <sup>35</sup> Jitia tai siri te ponchise, manu khan bisi khong

kora karone sipahi khan taike uthaikene loi jaise. <sup>36</sup> Kelemanane bisi manu tai piche-picche hala kori thakise, "Taike morai dibi!"

*Paul Pora Manu Khan Logot Kotha Korise*

<sup>37</sup> Jitia taikhan Paul ke bondhi rakha jagate loi jabole thakise, tai mukhyo henedhikari ke koise, "Moi apuni ke kiba kotha kobo paribo?" Tai koise, "Tumi Yunani kotha kobo pare? <sup>38</sup> Olop din age te, ekjon Egypt manu, jun pora chukli mari kene gondugol kori dise, aru char-hajar 'Hathiara manu khan ke' jongol te loi jaise, utu manu to tumi nohoi?" <sup>39</sup> Kintu Paul koise, "Moi to Tarsus laga Yehudi ase Cilicia sheher te jonom huwa manu ase. Aru moi utu khas sheher laga ekjon manu ase. Etu nimite, apuni logote anurodh kori ase, moike manu khan logot kotha kori bole dibi." <sup>40</sup> Jitia tai agya dise, Paul siri te khara hoi kene kotha kobole tai hath uthaise, aru manu khan chup hoi jaise, aru jitia taikhan chup hoise, titia tai Yehudi bhasa te kotha koise. Tai koise,

## 22

<sup>1</sup> "Bhai khan, aru baba khan, moi etiya nijor laga safai te apnikhan usorte kotha kobole ase, etu ke huni bhi." <sup>2</sup> Aru jitia tai Yehudi bhasa te koise, taikhan arubi ekdom chup thaki jaise. Titia tai aru koise,

<sup>3</sup> "Moi Yehudi ase Cilicia laga Tarsus sheher te jonom luwa, etu sheher pora Gamaliel laga theng te bohi kene amikhan laga baba khan laga niyom thik pora sikhi loise, aru Isor phale jor dikena aji apnikhan jineka kori ase tineka kori ahisele.

<sup>4</sup> Aru mota, maiki, hobi, etu dhorom Rasta te juwa khan ke bondhi ghor te dikene morai bhi di thakise, <sup>5</sup> etu kotha cholawta, bura khan aru sabha bhi sakhi dibo pare, moi taikhan pora ami laga bhai khan Damascus te thaka khan logote chithi likhi diya utu bhi loise, karone moi jai kene ta te kunba thakile dhori kene Jerusalem te ani taikhan ke sajai dibo bhabise. <sup>6</sup> Etu homoi moi Damascus punchibole usor hoi asele, titia din nisena homoi asele, aru sorgo pora achanak ekta dangor puhor ahi moi usorte thaki jaise. <sup>7</sup> Aru moi matite giri jaise, aru ekta awaj moike kowa hunise, 'Saul, Saul, kele tumi Moike digdar kori ase?' <sup>8</sup> Karone moi hudise, 'Probhu Apuni kun ase?' Aru Tai moike koise, 'Moi Nazareth Jisu ase, junke tumi dukh digdar di ase.' <sup>9</sup> Aru jun manu moi logot ahise, taikhan bhi puhor to dikhise aru bhoi korise, kintu taikhan moike kotha kowa laga awaj to huna nai. <sup>10</sup> Titia moi koise, 'Moi ki koribo lage Probhu?' Aru Probhu moike koise, 'Uthi kene Damascus te jabi, aru ta te tumi ki-ki koribo lage etu sob tumike koi dibo.' <sup>11</sup> Aru utu puhor bisi huwa karone moi eku dikhibo para nai, titia moi laga sathi khan laga hath dhurikena he moi Damascus te ahise. <sup>12</sup> Titia Ananias koi kene ekjon asele, tai niyom mani thaka ekjon asele, aru ta te thaka Yehudi khan bisi sonman kori thaka manu ase. <sup>13</sup> Tai ami laga usorte ahikena koise, 'Bhai Saul, apuni laga suku dikhi bhi.' Aru etu homoi te moi dikhibole parise aru taikhe dikhise. <sup>14</sup> Titia tai koise, ami laga baba khan laga Isor he tumike basi loise, tumi he tai itcha ke janibole aru

Dharmikta Jonke sabo paribole aru tai nijor mukh pora kowa awaj ke huni bole. <sup>15</sup> Keleman tumi ki dikhise aru ki hunise etu sob manu ke koi dibole tai sakhi bonai dise. <sup>16</sup> Tinehoile apuni etiya bhi kele bohi ase? Uthi kene baptizma loi lobi, aru prathana kori kene tai naam pora tumi laga paap dhui dibi.’ <sup>17</sup> Titia moi aru Jerusalem te ahi kene mondoli te prathana kori asele, titia moi Atma te bhorta hoi kene darshan dikhise. <sup>18</sup> Aru moi Probhu ke dikhise, Tai moike koise, ‘Joldi Jerusalem chari kene jabi, keleman taikhan Ami laga kotha tumi gawahi diya ke namanibo.’ <sup>19</sup> Karone moi koise, ‘Probhu, moi pora biswasi khan mondoli te dhurikena bondhi ghor te diya aru mari thaka taikhan jani ase. <sup>20</sup> Aru jitia Apuni nimate mori juwa Stephen ke khun giraikena morai di thakise, ta te moi bhi thakise, aru jun manu khan pora taikhe morai dise utu khan laga kapra ke moi rukhi thakise.’ <sup>21</sup> Titia Tai moike koise, ‘Jabi, keleman moi tumike yate pora dur Porjati khan logot pathai dibo.’

### *Paul Aru Mukhyo Henedhikari*

<sup>22</sup> Aru taikhan etu kotha kowa tak taikhe huni thakise. Etu pichete taikhan awaj uthaikene hala kori koise, “Eneka manu ke prithibi pora hatai dibi, keleman tai jinda thaki bole thik nohoi.” <sup>23</sup> Titia taikhan hala kori kene taikhan laga kapra khan ulai phelaise, aru upor hawa te dhul urai thakise, <sup>24</sup> titia mukhyo henedhikari pora Paul ke bondh kora jagate loi jabole hukum dise, aru manu khan kele taikhe iman ghusa kori ase etu janibole taikhe chabuk pora mari kene

bhal pora hudibole koise. <sup>25</sup> Aru taikhan jitia taikhe chabuk mari bole taiyar korise, Paul pora tai usorte khara thaka henapoti ke koise, "Rome manu ke eku golti nathaki kene bhi chabuk mari bole niyom te ase?" <sup>26</sup> Jitia henapoti etu kotha hunise tai mukhyo henedhikari logote jai kene koise, "Apuni eneka kele kori ase? Tai Rome laga nagrik ase." <sup>27</sup> Titia henedhikari tai logot te ahikena koise, "Moike kobi, tumi Rome laga nagrik ase?" Paul koise "Hoi". <sup>28</sup> Etu huni kene mukhyo henedhikari pora koise, "Moi to Rome laga nagrik hobole bisi toka poisa pora kinise." Kintu Paul koise, "Moi to jonom pora he Rome laga nagrik ase." <sup>29</sup> Titia jun taikhe mari bole thakise, taikhan loge- loge tai usor pora joldi hati jaise. Aru kitia mukhyo henedhikari bhi Paul to Rome laga nagrik ase koi kene janise, tai bhi bhoi khaise kele koile tai pora Paul ke dhori kene bandh kora karone.

### *Sabha Age Te Paul*

<sup>30</sup> Dusra din Yehudi khan pora ki nimite Paul ke doshi korise, etu janibole mukhyo henedhikari pora Paul ke khuli dise, aru mukhyo purohit khan aru sabhakan ke joma kori bole hukum dise, aru Paul ke loi kene taikhan age te khara kori dise.

## 23

<sup>1</sup> Titia Paul sabha laga adhikari khan phale dhyan pora saikene koise, "Bhai khan, moi aji tak ekjon bhal nagrik nisena thakise, ami sapha mon pora Isor usorte bhal pora ahise." <sup>2</sup> Titia moha purohit Ananias pora jun khan Paul usorte khara

ase taikhan pora Paul laga mukh te marikena bondh kori dibole hukum dise. <sup>3</sup> Titia Paul taike koise, “Isor pora apuni ke mari dibole ase, chuna pora boga kori rakha dewar khan. Isor apuni ke saja dibo, apuni niyom pora amike bisar kori bole bohi ase, aru kele niyom bhirodh te moike mari bole hukum di ase?” <sup>4</sup> Kintu jun khan tai usorte khara asele taikhan koise, “Kile apuni Isor laga moha purohit ke ninda kori ase?” <sup>5</sup> Titia Paul koise, “Bhai khan, tai moha purohit ase koi kene moi jana nai. Kilekoile likha ase,

Tumi pora tumi laga cholawta laga biya kotha nakobo.”

<sup>6</sup> Kintu jitia Paul dikhise sabha laga ekta bhag Sadducee khan aru dusra bhag Pharisee khan ase, tai sabha te jor pora koise, “Bhai khan, moi Pharisee ase aru Pharisee khan laga chokra ase, aji moike bisar kora to morija-a khan jee uthibo laga asha laga kotha kowa nimite he ase.” <sup>7</sup> Aru jitia tai etu koi dise, Pharisee aru Sadducee khan laga majote kotha namila hoise, aru sabha to dui bhag hoi jaise. <sup>8</sup> Kelemanee Sadducee khan punoruthan, sorgodoth aru atma khan te biswas nakore: kintu Pharisee khan to etu sob bhi hosa ase koi kene mani thake. <sup>9</sup> Titia bisi jor pora hala hoi jaise aru Pharisee khan jaga pora uthi kene apatti kori koise, “Amikhan etu manu laga eku dosh pa-a nai. Kintu jodi ekta atma pora, nohoile bhi, ekjon sorgodoth pora taike kotha koi kene ase koile?” <sup>10</sup> Titia taikhan bisi jhagara hoi jaise, aru henedhikari bhabise taikhan Paul ke tukra kori dibo, aru etu laga bhoi pora tai sipahi khan ke pathaise, aru joborjosti sabha pora taike

bondh kora jagate loi jabole hukum dise.

<sup>11</sup> Kintu utu rati te tai usorte Probhu ahi kene khara hoi kene koise, “Mon dangor hobi, kelemane tumi Jerusalem te Ami laga gawahi dise, tineka tumi Rome te bhi Ami laga gawahi dibo lagibo.”

*Paul Ke Morai Dibole Buddhi Kora*

<sup>12</sup> Jitia din ulaise, kunba Yehudi khan mili kene, jitia tak Paul ke loi kene morai nadibo, titia tak eku bhi nakhabo koi kene kosom korise. <sup>13</sup> Jun khan kotha milai thakise eitu khan chalis-jon pora bhi bisi thakise. <sup>14</sup> Titia taikhan mukhyo purohit khan aru bura khan logote jai kene koise, “Amikhan jitia tak Paul ke morai nadibo titia tak eku bhi nakhabo koi kene kosom khaise. <sup>15</sup> Karone apnikhan aru sabhaxhan mili kene mukhyo henedhikari logot khobor pathai dibi aru Paul ke bhal pora kotha hudibi kobi, aru eneka koi kene tai pora Paul apnikhan logot anibo. Aru amikhan to tai yate napuncha age te taike morai dibole taiyar ase.” <sup>16</sup> Kintu jitia Paul didi laga chokra pora taikhan Paul ke mari bole rukhi thaka janise, tai Paul ke bondh kora jagate ahikena taike etu kotha koi dise. <sup>17</sup> Titia Paul ekjon henapoti ke mati anikena koise, “Etu chokra ke mukhyo henadhikari logote loijabi, tai kiba kobole ase.” <sup>18</sup> Karone tai taike loi kene mukhyo henedhikari logot jaise aru koise, “Bondhi ghor te thaka Paul pora moike matise aru moike etu lora apuni logote loi ani dibi koi kene anurodh korise. Tai apuni logote kiba kobole ase koise.” <sup>19</sup> Titia mukhyo henedhikari pora tai hath dhurikena kinar te alag loijai kene

hudise, “Tumi moike ki kobole ase?” <sup>20</sup> Aru tai koise, “Yehudi khan mili kene Paul laga kotha ke aru bhal pora hudibole kali sabha te taike loi anibole bhabona pora apuni logot anurodh kori bole ase. <sup>21</sup> Kintu taikhan laga kotha namanibi, kelemane taikhan chalis-jon pora bhi bisi manu taike morai nadiya tak ekubi kha luwa nakoribo koi kene kosom khai kene ase, aru taikhan apuni pora hukum pabole etiya bhi rukhi thaki ase.” <sup>22</sup> Titia mukhyo henedhikari pora lora ke koise, “Etu kotha tumi moike kowa khan kunke bhi nokobi.”

### *Rajyopal Felix Usorte Paul Ke Pathaise*

<sup>23</sup> Aru tai henapoti duijon ke mati ani kene koise, “Aji rati nou-baji te dui soh sipahi aru sat-ta ghora chola sipahi aru dui soh jathi-dhora sena khan loi kene Caesarea te jabole taiyar kori dibi. <sup>24</sup> Aru Paul ke jabole nimite ghora taiyar koribi aru taike bachai kene Governor Felix logot loijabi. <sup>25</sup> Tai eneka chithi bhi likhi dise:

<sup>26</sup> “Claudius Lysias pora Rajyopal Felix ke salam jonai ase. <sup>27</sup> Etu manu to Yehudi khan pora taike dhori kene morai dibole thaka te moi jani loise, tai Rome laga nagrik ase, moi joldi sipahi loijai kene taike bachai loise. <sup>28</sup> Aru taikhan kele taike golti lagai ase, etu janibole mon hoi kene moi taike sabha te loi jaise. <sup>29</sup> Aru moi jani paise taikhan nijor niyom kotha laga kotha namila pora taike golti kora he ase, aru taike morai dibole aru bandhi bole eneka eku bhi golti pa-a nai. <sup>30</sup> Aru jitia Yehudi khan taike morai dibole kotha milai thakise, etu kotha moike jonai

dise, titia moi taike joldi apuni logote pathai dise, aru tai golti diya khan ke bhi taikhan laga kotha apuni laga usorte kobole koi dise.”

<sup>31</sup> Titia sipahi khan taikhan ke kowa nisena rati te Paul ke Antipatris te loijai dise. <sup>32</sup> Dusra dinte sipahi bisi khan wapas jai jaise, kintu ghora chola sipahi khan ke Paul logot jabole dise. <sup>33</sup> Jitia sipahi khan Caesarea te ponchise, taikhan pora Governor ke chithi dise aru Paul ke bhi tai usorte khara kori dise. <sup>34</sup> Aru Governor pora chithi porhi kene hudise tai kun desh laga ase. Aru jitia tai jani loise tai Cilicia desh pora ase, <sup>35</sup> tai koise, “Jitia tumi laga golti diya khan ahibo, titia moi tumi laga kotha hunibo.” Aru taike Herod bisar kora jagah te rakhi dibi koi kene hukum dise.

## 24

### *Caesar Te Felix Age Te Paul*

<sup>1</sup> Pans-din pichete mukhyo purohit Ananias aru kunba bura khan aru ekjon ukil jun laga naam Tertullus asele, taikhan arubi ahikena Governor ke Paul bhirodh te kotha koise. <sup>2</sup> Aru jitia Paul ke Governor age te anise, Tertullus taike golti dikene eneka koise, “Apuni karone amikhan bisi shanti thaki ase, aru etu desh te apuni laga gyaan pora bodli korise;

<sup>3</sup> Amikhan laga sob jagah te aru hodai etu karone khushi pora apuni ke dhanyavad kori thake. <sup>4</sup> Hoilebi, apuni laga homoi aru bhi nolobole, ami apuni logot te anurodh ase, morom kori amikhan laga ekta kotha huni bhi.

<sup>5</sup> Kelemanee etu manu to mara-mari kore aru

duniya te thaka Yehudi khan laga sob jagah te bhirodh aru gondugol kori thaka Nazareth manu ekjon cholawta ase, amikhan jani paise. <sup>6</sup> Tai mondoli ke bhi apobitro kori bole bisarisele, etu nimate amikhan taikhe dhuri loise, aru ami laga niyom pora taikhe bisar koribo thakise. <sup>7</sup> Kintu henapoti pora Lysias te ahi kene joborjosti amikhan laga hath pora taikhe dhori loi jaise. <sup>8</sup> Taikhe golti diya khan ke apuni usorte ahi kobole koise, kintu apuni nijor hudile jani jabo amikhan taikhe ki karone golti di ase.” <sup>9</sup> Aru Yehudi khan bhi mili kene taikhe etu sob kotha to hosa ase koi dise.

<sup>10</sup> Titia Governor Paul ke kotha kobole nimate koise, titia Paul koise, “Ami bujhi ase apuni bisi saal pora etu jati khan laga bisar kori ahi thakise, etu karone moi khushi pora ami laga sob kotha apuni ke kobole ase.

<sup>11</sup> Keleman e apuni nijor jani jabo moi jitia pora aradhana kori bole Jerusalem te ahise, barohdin pora bisi huwa nai. <sup>12</sup> Aru taikhan moike mondoli aru mondoli aru sheher te kun logot te bhi kotha namila, nohoile gondugol lagi thaka pa-a nai. <sup>13</sup> Aru taikhan ki kotha loi moike bodnam lagai ase, etu kun bhi sakhi dibo na paribo. <sup>14</sup> Kintu moi apuni ke hosa kotha koi ase, taikhan juntu Rasta ke ekta dol mati ase, eneka laga rasta pora Isor ke sewa kori ahise. Ki niyom te ase aru ki bhabobadi khan pora likhise, etu sob te moi bhal pora mani kene ahise. <sup>15</sup> Aru ami Isor ke mon dangor laga etu asha ase, juntu etu manu khan nijor bhi rukhi ase, juntu to ase mori kene jinda hobole thaka, dharmik aru

adharmik khan sob bhi. <sup>16</sup> Etu karone moi Isor phale bhi aru manu phale bhi sapha bhabona bhal thakibo karone kosis kori thakise. <sup>17</sup> Aru bisi saal pichete moi nijor jati khan ke poisa dibole anise, dukh thaka jati khan ke daan dibole anise. <sup>18</sup> Taikhan ami etu kori thaka dikhise, mondoli pora sapha kori loi kene, bhir nohoile gondugol bhi thaka nai. <sup>19</sup> Aru kunba Yehudi khan Asia pora ahise, taikhan ami laga bhirodh te thakile, taikhan apuni usorte ahi kene kobo lage. <sup>20</sup> Nohoile, yate etu manu thaka khan bhi jodi moi kiba golti kaam kora paise koile moi Yehudi sabha usorte khara thaka homoi te koi dibi, <sup>21</sup> khali ekta kotha karone ase, juntu moi sob manu usorte koisele, 'Mora khan aru jee uthibo, etu kotha ke loi aji moike apuni usorte khara kori bisar kori ase.' "

### *Senapoti Hathte Paul Ke Rakhise*

<sup>22</sup> Jitia Felix etu kotha hunise, tai aru poritran Rasta ke bhal pora janibo mon hoi kene, taikhan ke rukhai dise. Tai koise, "Jitia sipahi laga senapoti Lysias Jerusalem pora ahibo, moi tumi laga bisar koribo." <sup>23</sup> Aru tai henapoti ke koi kene Paul ke bondhi ghor te rakhise, hoilebi taike bhi bandi narakhikena khula chari dibole koise, aru tai sathi khan tai logote ahibole bhi mana na koribi koise.

<sup>24</sup> Aru olop din pichete Felix tai laga Yehudi maiki Drusilla logote wapasa ahise, jun Yehudini asele, aru tai Paul ke mati bole pathaise aru tai Paul द्वारा hunise Jisu Khrista ke biswas laga kotha. <sup>25</sup> Aru jitia Paul pora taike dhormikta aru nijorke rukhabo para aru aha dinte bisar hobole

thaka kotha khan thik pora koi dise, Felix bisi bhoi koi kene koise, “Etu bar to jai jabi. Jitia moi homoi pabo titia tumike aru matibo.” <sup>26</sup> Tai Paul pora poisa bhi pabo bhabikena tai hodai Paul ke mati ani kotha kori thakisele. <sup>27</sup> Kintu dui saal pichete Porcius Festus he Felix jagah te Governor hoi jaise, kintu Felix to Yehudi khan ke khushi kori bole mon asele, aru tai Paul ke bondh kora jagate he aru bhi thaki bole dise.

## 25

### *Paul Pora Caesar Logot Anurodh Kora*

<sup>1</sup> Titia, Festus etu jagate ahise, aru tin din pichete, tai Caesarea pora Jerusalem te jaise.

<sup>2</sup> Titia mukhyo purohit khan aru Yehudi laga cholawta khan Festus logot Paul bhirodh te golti lagaise, aru anurodh korise. <sup>3</sup> Aru Paul laga bhirodh te ekta upkar Festus ke mangise - ki Festus pora Paul ke Jerusalem te matibo nimate-

eneka hoile taike loija-a homoi te kunba khan rasta te rukhai kene taike morai dibole bhabona thakise. <sup>4</sup> Kintu Festus koise Paul to Caesarea te bondhi ase, aru tai nijor bhi joldi ta te jabole ase.

<sup>5</sup> Tai koise, “Etu karone tumikhan majote kun cholawta ase taikhan moi logote jabole dibi. Jodi etu manu kiba biya kaam korise koile, taikhan taike golti dibole kobi.”

<sup>6</sup> Aru tai dos din nisena taikhan logote thaki kene tai Caesarea te ahi jaise, aru dusra din bisar jagate bohi kene Paul ke loi anibole hukum dise.

<sup>7</sup> Aru jitia Paul ahise, Jerusalem pora aha Yehudi khan ahi tai age piche khara hoi kene taike bisi biya golti lagaise jun to taikhan nijor bhi

sakhi koribo napare. <sup>8</sup> Titia tai nijor kotha koise, “Moi Yehudi khan niyom laga bhirodh, nohoile girja ke bhirodh, nohoile Caesar laga bhirodh te eku bhi golti kora nohoi.” <sup>9</sup> Kintu Festus Yehudi khan ke khushi koribo itcha pora Paul ke koise, “Tumi Jerusalem te jai kene ami laga bisar jaga usorte etu kotha loi bisar korile tumi itcha hobo?” <sup>10</sup> Titia Paul koise, “Moi etiya bhi Caesar bisar jaga usorte khara ase, ami laga bisar yate hobo lage, apuni bhi jani ase, moi Yehudi khan logot eku golti kora nohoi. <sup>11</sup> Jodi moi golti ase, aru etu nimate moike morai dibole layak ase koile moi morile bhi apatti nai. Kintu ki kotha loi kene moike doshi di ase, jodi ekta bhi hosa nohoi koile, kunbi moike taikhan hathte dibo na paribo, moi Caesar logot anurodh koribo.” <sup>12</sup> Titia Festus pora sabhaxhan ke kotha kori kene koise, “Tumi Caesar logote kotha mila bole kori ase. Karone tumi Caesar logote jabo!”

### *Agrippa Aru Bernice Age Te Paul*

<sup>13</sup> Aru olop din juwa pichete Raja Agrippa aru Bernica Caesarea te ahi Festus ke adar dise. <sup>14</sup> Aru duijon ta te bisi din thaka pichete, Festus Paul laga kotha raja ke koi dise. Tai koise, “Felix pora yate kunba ekjon ke bondh kora jagate rakhi ase. <sup>15</sup> Aru jitia moi Jerusalem te jaise, Yehudi khan laga mukhyo purohit khan aru bura khan tai bhirodh te golti kotha moike koise, bisar kori taike saja dibole. <sup>16</sup> Kintu moi taikhan ke koise, Rome laga niyom te to hoile, kunke golti lagai ase, taike bisar kora dinte taike golti lagai diya khan usor nijor sob kotha kobole homoi

nadi kene taike saja diya niyom nai. <sup>17</sup> Karone jitia taikhan yate ahi kene joma hoise, moi deri nakori kene dusra din, bisar jagate bohi kene utu manu ke loi anibole hukum dise. <sup>18</sup> Jitia taike golti diya manu khan khara koi kene tai laga golti koise, taikhan eku biya golti dibo para nai, jineka moi bhabise tineka huwa nai. <sup>19</sup> Kintu taikhan nijor dhorom kotha aru mori juwa Jisu koi kene ekjon asele, Paul koi utu jinda ase, etu kotha loi kotha namila he ase. <sup>20</sup> Aru etu laga motlob moi bhal pora bujhi bole para nai, karone moi taike hudise jodi tai etu kotha ke bisar kori bole Jerusalem te jabole mon kore na nai. <sup>21</sup> Kintu Paul koise tai Caesar logote anurodh koribo, etu karone moi taike Caesar logot pathai nadiya tak taike bondh kora jagate thaki bole hukum dise.” <sup>22</sup> Titia Agrippa pora Festus ke koise, “Moi nijor utu manu laga kotha hunibo itcha ase. Festus jawab dise, “Kali apuni tai kotha huni bole pabo.”

<sup>23</sup> Karone dusra din Agrippa aru Bernica duijon dhum-dham pora bhal kapra lagai kene aru sheher laga daruga khan aru dusra cholawta logote sabha te ahise. Aru jitia Festus hukum dise, titia Paul ke loi anise. <sup>24</sup> Festus koise, “Raja Agrippa aru jun yate ahi bohi ase, apnikhan bhi etu manu ke dikhi ase, etu manu nimite yate thaka Yehudi khan sob aru Jerusalem te thaka sob moi logote binti korise tai jinda thaki bole nalage koise. <sup>25</sup> Kintu tai moribo lage eneka eku kaam kora moi pa-a nai, aru tai nijor moi Caesar logot anurodh koribo koise, to moi taike pathai dibole faisla kori loise. <sup>26</sup> Kintu tai laga

kotha ami Caesar logot kineka likhibo thik napai-a karone, moi taike apnikhan aru khaas pora Raja Agrippa apuni usorte loi anise, pichete kiba likhi bole pabo bhabona kori kene. <sup>27</sup> Kelemanekjon manu ke ki nimite bondhi nisena pathai ase etu thik pora nalikhile, etu to moi hisab te thik nohobo.”

## 26

### *Agrippa Age te Paul Laga Kotha*

<sup>1</sup> Titia Agrippa pora Paul ke koise, “Tumi nijor laga kotha kobole homoi di ase.” Titia Paul tai hath uthaikene tai nijor laga safai diya kotha koise.

<sup>2</sup> “Raja Agrippa, ji-ji kotha Yehudi khan moike bodnam lagai ase, aji apuni usorte utu laga sob jowab dibole homoi pa-a karone moi bisi khushi hoi ase; <sup>3</sup> kelemanekjon Yehudi khan laga niyom te kotha namila kora sob apuni jani thaka karone, aru moike morom kori nomro pora moi laga kotha huni bole anurodh kori ase. <sup>4</sup> Jineka ami chokra thaka homoi te Jerusalem pora nijor jati khan logote ahise, etu sob Yehudi khan jane. <sup>5</sup> Taikhan jodi gawahi dibole mon thakile to shuru pora taikhan moike jani ase, moi Pharisee hoi kene taikhan laga dhorom te sob pora kara te choli ahise. <sup>6</sup> Aru etiya moi yate khara koi kene bisar huwa to Isor ami laga baba khan ke ki kosom dise utu asha kora karone ase. <sup>7</sup> Etu kosom ke pabo karone asha pora amikhan baroh-jati khan pura mon lagai kene raat-din Isor ke sewa kori ahise. Raja Agrippa, etu asha nimite he Yehudi khan moike golti lagai

ase. <sup>8</sup> Jitia Isor mora manu ke jinda kore, kele apnikhan etu to biswas kori bole nohoi bhabe? <sup>9</sup> Hosa ase, moi bhi Nazareth Jisu naam bhirodh te bisi kaam koribo lage bhabi ahise. <sup>10</sup> Aru moi Jerusalem te eneka korise, mukhyo purohit khan pora hukum loi pobitro khan ke dhori bondhi ghor te haali kene morai diya te moi laga bhi itcha thakise. <sup>11</sup> Aru moi sob mondoli te taikhan ke dukh di-dikene joborjosti kori thakise, khali etu he nohoi kintu bisi gusa hoi kene bahar laga sheher te bhi jai kene taikhan ke dukh digdar di thakise.

### *Paul Nijor Mon Bodli Huwa Laga*

<sup>12</sup> Jitia etu kori bole moi moha purohit khan pora hukum loi kene Damascus te jai thakise; <sup>13</sup> aru titia rasta he, O Raja, din laga homoi te akas pora moi dikhise suryo pora bhi bisi ujala, moi aru ami laga logote jai thaka khan usorte chamkise. <sup>14</sup> Aru jitia amikhan sob matite giri jaise, moi ekta awaj Ibrani bhasa te moike kowa hunise, 'Saul, Saul tumi kele Moike digdar kori ase? Tumi dhar thaka te laat marile tumi karone bisi dukh hobo.' <sup>15</sup> Karone moi koise, 'Probhu, Apuni kun ase?' Aru Probhu pora koise, 'Moi Jisu ase junke tumi digdar kori thake.' <sup>16</sup> Kintu uthibi aru tumi laga theng te khara hobi; kelemane Moi aji tumi ki dikhise etu manu ke kobole aru aha kali bhi dikha bole thaka khan ke gawahi dibole dikhai dise; <sup>17</sup> aru Moi tumike Yehudi aru Isor najana khan logote pathabo, aru taikhan hath pora tumike bachai thakibo, <sup>18</sup> tumi pora taikhan laga suku khuli dibo aru taikhan andhar pora ujala te ani dibole, aru Saitan laga takot pora Isor

phale ghurai anibole, paap pora khyama pabole, aru biswas pora pobitro khan logote ki jaga ase utu pabole.’ <sup>19</sup> Karone, Raja Agrippa, moi etu sorgo darshan laga kotha ke namani kene chari diya nohoi; <sup>20</sup> kintu poila moi Damascus te thaka khan ke koi dise, aru Jerusalem te thaka khan ke bhi, aru Judea sob te bhi, aru Isor najana khan ke bhi taikhan laga paap pora Isor phale ghuri ahibole, aru mon bodli huwa kaam khan kori bole koi dise. <sup>21</sup> Kelemanee etu karone Yehudi khan mondoli pora moike dhori loise, aru morai dibole hoise le. <sup>22</sup> Kintu Isor laga modot pora aji tak yate khara hoi kene chutu, dangor sob usorte gawahi di aru Moses aru bhabobadi khan pora aha dinte ki hobole ase etu kotha kowa khan he nohoile dusra eku kowa nai-<sup>23</sup> etu kotha Khrista bisi dukh koribo aru mora pora tai he prothom jee uthibo, Tai Yehudi khan aru Porjati khan logote puhor laga prochar koribo.

<sup>24</sup> Jitia Paul tai nijor kotha koi dise, Festus jor pora hala kori koise, “Paul, tumi pagla hoise; bisi sikha karone tumike pagla bonai dise.” <sup>25</sup> Kintu Paul koise, “O mohan Festus, moi pagla nohoi, kintu hosa aru buddhi laga kotha koi ase. <sup>26</sup> Raja bhi etu sob jani ase, moi eku bhoi nakori kene koi ase, aru etu kotha tai najana eneka ekta bhi kowa nai koi kene moi bhabi ase; etu ghatna to manu khan nathaka te kora nohoi. <sup>27</sup> Raja Agrippa, apuni bhabobadi khan ke biswas kore? Hoi, moi jane, apuni biswas kori ase.” <sup>28</sup> Titia Agrippa Paul ke koise, “Olop homoi te, tumi aram pora moike Khristan bonai dibole ase?” <sup>29</sup> Paul koise, “Isor logote moi anurodh kori ase,

olop nohoile bisi homoi pichete hoilebi, aji apuni logote bohi ami laga kotha huni thaka sob bhi moi nisena hobole dibi, hoilebi jineka moike rusi pora bandhikena ase etu nisena nohoi.”

<sup>30</sup> Jitia tai etu kotha koise, titia Raja aru Governor aru Bernice, aru taikhan logote bohi thaka sob khara hoi jaise; <sup>31</sup> aru taikhan alag jai kene nijor te kotha korise, aru koise, “Etu manu mori bole aru bandibole eneka eku biya kaam kora nohoi.” <sup>32</sup> Titia Agrippa pora Festus ke koise, “Jodi etu manu Caesar logot anurodh nakorile, taike chari dile bhi hobole asele.”

## 27

### *Paul Jahaaj Pora Rome Te Juwa*

<sup>1</sup> Aru jitia amikhan Italy te jabole faisla kori loise, taikhan Paul aru dusra bondh kora manu khan ke Julius koi kene Augustus Regiment laga henapoti ekjon laga hathte di dise. <sup>2</sup> Titia amikhan Adramyttium pora ekta jahaaj Asia samundar phale jabole thaka te uthijaise. Aru amikhan safar korise. Thessalonica pora Macedonia laga ekjon Aristarchus koi kene bhi amikhan logote asele. <sup>3</sup> Aru dusra dinte amikhan Sidon sheher te ahise, aru Julius pora Paul ke bisi morom korise aru tai sathi logote berabo dise, aru tai ki lage sob taike di thakise. <sup>4</sup> Aru amikhan ta te pora jabole ulaise hoilebi hawa bisi jor pora mara karone jahaaj to Cyprus phale loi kene jaise. <sup>5</sup> Aru amikhan Cilicia aru Pamphylia samundar paar kori Lycia laga sheher Myra te ahi jaise. <sup>6</sup> Ta te henapoti he Alexandria laga

ekta jahaaj Italy te jabole thaka paikene amikhan ke ta te uthai dise. <sup>7</sup> Amikhan bisi din aste-aste jai thakise, aru bisi digdar pora Cnidus ponchise, kintu hawa bisi mara pora amikhan age jabole para nai, etu pora jahaaj ke loi kene Crete phale loi jaise, juntu Salmone usorte ase. <sup>8</sup> Amikhan bisi digdar pora safar korise aru Lysea sheher usorte Bhal Jaga eneka te ponchise.

<sup>9</sup> Etiya bisi homoi jaise, panite bera bole digdar hoise, aru etiya to Yehudi khan laga upwas din bhi paar hoise, karone Paul taikhan ke hoshiar kori bole, <sup>10</sup> koise, “Hey manu khan, amikhan etiya yate pora jaise koile digdar aru bisi nuksan bhi hobo pare, khali saman aru jahaaj he nohoi, kintu manu jibon bhi jabo pare.” <sup>11</sup> Hoilebi henapoti pora Paul laga kotha namani kene jahaaj laga malik khan laga kotha he manise. <sup>12</sup> Aru utu jaga to thanda dinte ta te thaki bole thik nohua karone bisi manu parile Phoenix te he thakile bhal hobo bhabise. Phoenix to Crete usorte ekta jaga ase, dakshin-paschim aru uttor-paschim phale bhi jabo para jagah ase.

### *Samundar Te Tufan*

<sup>13</sup> Titia dakshin pora halka-halka hawa ahise, jahaaj chola khan bhabise taikhan ki lage etu sob taikhan logot ase. Etu pora taikhan Crete phale jabole jahaaj khuli dise. <sup>14</sup> Kintu bisi deri nohoi kene dangor hawa pani laga tufan ta te pora ahi taikhan ke lagise. <sup>15</sup> Jitia tufan pora jahaaj ke dhorise, taikhan aru age jabo napari kene hawa pora jahaaj ke kote loi jabole ase, loijabo dise. <sup>16</sup> Titia Cauda naam laga ekta majuli

te bisi digdar pora punchise aru chutu naw ke dhori rakhibo parise. <sup>17</sup> Titia taikhan chutu naw ke uthai anise aru niche pora bandi loise. Syrtis laga balu matite lagi bole bhoi pora jahaaj kapra khan khuli dise, aru jahaaj ke hawa pora loijabo dise. <sup>18</sup> Kintu dusra din tak amikhan ke tufan pora bisi digdar di thakise, etu karone taikhan jahaaj pora saman khan samundar te phelai dise. <sup>19</sup> Aru tin din pichete amikhan nijor hath pora jahaaj laga saman uthaikene samundar te phelai dise. <sup>20</sup> Aru jitia bisi din tak suryo aru tara khan ula nai aru tufan bhi bisi mari thakise, titia amikhan bachibole asha sob chari dise. <sup>21</sup> Titia bisi din pora kha-luwa nakora karone, Paul khara kori kene taikhan ke koise, "Sabi, apnikhan ami laga kotha mani kene Crete pora najaile bhal hobole asele, tinehoile amikhan eneka digdar aru nuksan nohobo asele. <sup>22</sup> Kintu etiya moi apnikhan ke mon dangor rakhibole koi ase, kelemane khali jahaaj ke he nohoile, kunke bhi digdar nohobo. <sup>23</sup> Kelemane moi jun laga ase, aru junke sewa kore, tai sorgodoth aji rati moi logote ahise. <sup>24</sup> Aru koise, 'Paul, tumi bhoi na koribi. Tumi Caesar age te khara hobo lagibo, aru sabi Isor tumike morom kori kene tumi logote juwa manu khan sob etiya bhi tumi logote he ase.' <sup>25</sup> Karone manu khan mon dangor hobi! Kelemane moi Isor ke biswas kore, jineka Tai koise tineka hobo. <sup>26</sup> Hoilebi amikhan ekta majuli te loijai kene rakhibo pare."

<sup>27</sup> Titia choudah rati hoise, aru amikhan Adriatic Samundar majote loijai kene thaki jaise, aru adha rati te jahaaj chola khan bhabise taikhan to

kunba mati usorte ahi punchise. <sup>28</sup> Aru taikhan pani laga galta ke naapi sai sele bisi lamba galta thakise, ekta hath to choi feet ase, aru olop jai kene aru sai sele, pondro hath paise. <sup>29</sup> Titia pathor te lagibo bhoi pora taikhan piche phale pora loha longor charta phelai dise, aru phojur hobole prathana kori thakise. <sup>30</sup> Aru jahaaj chola manu khan jahaaj charikena polabole bhabise, taikhan jahaaj pora longor phelai diya nisena bahana pora chutu naw ke niche samundar te girai dise. <sup>31</sup> Titia Paul pora henapoti aru sipahi khan ke koise, “Jodi eitu khan jahaaj te nathakile apnikhan kitia bhi bachibole na paribo.” <sup>32</sup> Titia sipahi khan jai kene chutu naw laga rusi khan kati girai dise. <sup>33</sup> Aru jitia phojur hobole hoise, Paul sob manu ke kiba khabole koise. Tai koise, “Aji choudah din hoise apnikhan eku nakhai kene bhukha thaki ase. <sup>34</sup> Karone moi apnikhan ke koi ase, kiba khai lobi, kelemene eneka korile bachibo paribo, tumi laga matha pora ekta chuli bhi na giribo.” <sup>35</sup> Aru jitia tai utu koi dise, tai roti loi kene Isor ke dhanyavad dise, aru taikhan khai loise. <sup>36</sup> Titia taikhan bhi sob mon dangor hoi kene kha luwa kori loise. <sup>37</sup> Aru amikhan jahaaj te thaka khan sob 276 jon asele. <sup>38</sup> Karone jitia taikhan kha luwa kora hoise, taikhan jahaaj ke halka kori bole gehu uthaikene samundar te phelai dise.

### *Jahaaj Bhangi Jaise*

<sup>39</sup> Jitia din hoise, taikhan kuntu jagate ase janibole para nai, kintu ekta mati jagah dikhise, aru jahaaj ke ta te loijai kene rakhibole bhabise.

<sup>40</sup> Titia taikhan longor khan ke samundar te chari dise, aru jahaaj cholai thaka khuri bandi thaka ke khuli dise, aru jahaaj laga kapra khan age phale thaka ke uthaikene hawa pora kinar te loija bole dise, <sup>41</sup> Kintu jahaaj to jai kene samundar laga duita pani laga takot pora dhuri loise, aru jahaaj matite lagi kene thaki jaise, aru piche phale pani pora mari kene bhangai dise. <sup>42</sup> Aru koidi manu khan pani khilikena polai jabo bhoi pora sipahi khan taikhan ke morai dibole bhabise. <sup>43</sup> Kintu henapoti pora Paul ke bachai dibo mon asele, etu karone taikhan ke rukhai dise, aru jun pani khilibo jane, jap mari kene poila sukha matite jai jabile hukum dise. <sup>44</sup> Aru baki khan takhta pora aru kunba jahaaj bhanga tukra pora jabile hukum dise, aru sob bachi kene sukha matite punchise.

## 28

### *Paul Malta Te*

<sup>1</sup> Titia amikhan bachi kene ulai ahise, etu majuli laga naam Malta ase eneka jani loise. <sup>2</sup> Aru ta te laga manu khan bhi amikhan ke bisi morom korise, aru pani gira karone bisi thanda thakise, taikhan jui jolai amikhan ke jui thapibo dise. <sup>3</sup> Kintu jitia Paul khuri mutha uthaikene jui te haali se, ta te ekta saph gorom paikene khuri pora ulaise, aru tai hathte bandhi loise. <sup>4</sup> Titia ta te laga manu khan saph tai hathte bandi thaka dikhise aru taikhan majote kotha korise, “Ki hoilebi etu manu morai diya manu ase, tai samundar pora to bachi kene ahise, hoilebi niyom pora taike jinda thakibo nadibo.” <sup>5</sup> Kintu

tai hath hilai kene saph ke jui te phelai dise, aru tai eku huwa nai. <sup>6</sup> Kintu taikhan bhabise tai gaw phuli jabo, nohoile giri kene mori jabo. Kintu bisi deri tak sai thaki bole taike eku huwa nai, titia, taikhan laga bhabona alag hoise, aru tai ekta Isor ase bhabona korise.

<sup>7</sup> Etu jagah usorte Publius koi kene etu majuli laga prodhan cholawta asele, aru etu jaga laga mati bisi laga tai malik thakise, aru tai amikhan ke tai ghor te loijai kene tin-din bhal pora rakhi sewa korise. <sup>8</sup> Aru eneka hoise Publius laga baba bukhar aru pet-jai thakisele, Paul tai ghor te jai kene Isor ke prathana kori dise, aru tai uporte hath rakhi taike bhal kori dise. <sup>9</sup> Jitia eneka hoise, etu dikhi kene utu jaga laga manu khan jun bemar ase sob loi ani bhal hoi kene jaise. <sup>10</sup> Aru taikhan amikhan ke bisi sonman dise, aru jitia amikhan ta te pora jabole hoise, amikhan ki-ki lage sob ani jahaaj te rakhidise.

### *Dusra Jaga Khan Te Safar Kora*

<sup>11</sup> Tin mohina pichete, amikhan Alexandria laga ekta jahaaj te uthi kene jaise, jun thanda dinte ahi ta te thakise, etu jahaaj te “Jurwa Bhagwan” laga nuksa lagikena thaka asele. <sup>12</sup> Aru amikhan ahi Syracus sheher te ponchise, aru ta te tin din thakise. <sup>13</sup> Ta te pora amikhan Rhegium te ghuri ahise, aru ek din pichete dakshin phale pora hawa ahise, aru dusra din Puteoli te punchise. <sup>14</sup> Ta te amikhan biswasi bhai khan paise aru taikhan kowa karone taikhan logote saat din thaki jaise. Eneka pora amikhan Rome phale jaise. <sup>15</sup> Aru jitia ta te biswasi bhai khan Appius

Bajar aru Tinta Taverns kowa te amikhan ke lok kori bole ahise. Jitia Paul taikhan ke dikhise, tai Isor ke dhanyavad dise, aru tai mon bhi bisi mon dangor hoise.

<sup>16</sup> Jitia amikhan Rome te ahi punchise, Paul ke saithaka ekta sipahi logote alag te thaki bole agya dise.

### *Paul Rome Te*

<sup>17</sup> Tin din pichete tai Yehudi laga cholawta khan ke matise. Aru jitia taikhan ahi joma hoise, tai koise, “Bhai khan, ami pora moi laga manu bhirodh te nohoile khandan khan laga niyom bhirodh te eku bhi kora nohoi, hoilebi moike Jerusalem pora bondhi bonai kene Rome manu laga hathte di dise. <sup>18</sup> Taikhan huda-hudi kori kene moike chari bole hoisele, kelemane moi pora mori bole laga eku bodnam panai. <sup>19</sup> Kintu jitia Yehudi khan etu bhirodh te koise, moike Caesar logote anurodh koribo lagise, hoilebi moi nijor jati manu ke bodnam dibole kora nohoi. <sup>20</sup> Karone moi apnikhan ke lok kori kene kotha kori bole mati anise, manu khan moike rusi pora bandi rakha to Israel manu laga asha karone ase.” <sup>21</sup> Titia taikhan taike koise, “Amikhan Judea pora apuni laga naam te eku chithi bhi pa-a nai, aru bhai khan pora kunbi ahi kene apuni laga eku biya kotha kowa nai. <sup>22</sup> Kintu apuni laga bhabona ki ase, utu hunibo mon kori ase, kelemane sob jagah etu kotha mana khan bhirodh ase, amikhan jane.”

<sup>23</sup> Titia taikhan ek din tai logote ahi lok koribo koi kene jai jaise, aru bisi manu tai logote ahi joma hoise, titia tai phojur pora saam tak Isor

rajyo laga kotha bhal pora bujhi bo karone Moses laga niyom aru bhabobadi khan laga kitab te likha khan to bhal pora samjhai dise. <sup>24</sup> Titia kunba tai laga kotha ke biswas kori loise, kintu kunba to biswas kora nai. <sup>25</sup> Titia taikhan majote kotha namila hoise, aru taikhan Paul pora etu kowa pichete jai jaise, “Pobitro Atma he bhabobadi Isaiiah pora ami laga baba khan ke thik koise. <sup>26</sup> Tai koise, ‘Jai kene etu manu khan ke koi dibi,

“Tumikhan hunu to huni thakibo, kintu eku bhi nabujhi bo;  
Aru tumikhan sa-a to sai thakibo kintu eku bhi najanibo.

<sup>27</sup> Kelemanu eitu khan laga mon tan hoise  
Taikhan laga kaan bhi nahune,  
Aru taikhan suku bhi bondh kori loise.  
Eneka nohobo lage taikhan suku pora dikhi loi,  
Aru kaan pora huni loi,  
Aru mon pora bujhi loi kene ghuri ahile,  
Moi taikhan ke bhal kori dibo.’ ”

<sup>28</sup> Etu karone tumikhan jani lobi, Isor etu poritran laga kotha Porjati khan logote di dise, aru taikhan etu huni lobo.” <sup>29</sup> Aru jitia Paul etu kotha koi dise, Yehudi khan apaste kotha namila hoise, aru jai jaise.

<sup>30</sup> Titia, Paul bhara ghor loi kene dui-saal ta te thakise, aru jun taike lok kori bole ahe, khushi pora taikhan ke grohon kori thakise. <sup>31</sup> Aru tai bhoi nakori kene Isor rajyo laga kotha prochar kori aru Probhu Jisu Khrista laga kotha ke sikhai thakise, aru kun bhi taike rukhabole kosis kora nai.

**Indian Standard Version (ISV) Nagamese  
The New Testament in the Naga Pidgin language of  
India: Indian Standard Version (ISV) Nagamese**

copyright © 2019 Bridge Connectivity Solutions

Language: Nagamiz (Naga Pidgin)

Contributor: Bridge Connectivity Solutions Pvt. Ltd.

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-04-14

---

PDF generated using Haiola and XeLaTeX on 21 Feb 2024 from source files dated 23 Apr 2023

302d590c-b57a-5734-9dcb-8a22ed7685c4